


# BAEBELE, MOKAPO YA LIBOSO

 Mpe kopesa mwa—mwa...nakanisi eloko ya malamu koleka ezali te, mpo na ngai, bobele Liloba. “Kondima eutaka na koyoka, mpe koyoka Liloba na Nzambe.”

<sup>2</sup> Mikolo ya Misato, mpe ntango mosusu Mikolo ya Lomingo, moko na mayangani ya mokolo ya Lomingo, mpo na kopesa mokengeli mwa bopemi moke, oyo asengeli mpenza na yango, mpe nakanisaki ete ntango mosusu tózwa kaka Buku moko na Biblia. Tomesanáká kosala yango, mpe mbala mosusu kotikala likoló na yango mobu mobimba.

<sup>3</sup> Nayebi lisusu mbala moko totikalaki mobu mobimba mpenza na Buku ya Emoniseli. Kasi, oh, la la, makambo oyo toyekolaki, ezalaki mpenza kitoko mingi! Bongo tozongaki mpe tozwaki Buku ya Danyele, to Buku ya Genese, to Esode, mpe tozwaki kaka yango, mokapo na mokapo, mpe ekangaka mpenza Biblia mobimba elongo. Oh, nalingaka yango mpenza!

<sup>4</sup> Mwa moke na nsima, tokosengela kozwa e...Soki Nkolo akobi kopambola biso mpe tokobi kokende liboso, tokokóta na makambo ya bozindo mpenza awa na kati, bozindo mpenza. Mpe tokokende ná yango longwa na esika moko kino na mosusu, na kati ya Makomi.

<sup>5</sup> Mpe nalingaka kokokanisa Likomi ná Likomi. Lolenge wana nde esengeli kozala. Ezali kaka elili moko monene ya kitoko. Mpe kati na Buku oyo tozali koyekola, tokokóta kolobela, oh, lobiko, ná lobiko ya nzoto na Bonzambe, bilembo, mpe mawa. Mpe, oh, nyonso wana ekoya na kati awa.

<sup>6</sup> Mpe mbala mosusu ntango nakómaka na esika oyo esengelaka nákende na mayangani...Nayebaka ata moke te ntango nini nakosengela kozala na liyangani, kobengama mpo na kokende na liyangani moko, mpo ete nabongisaka eloko moko te, kino nakoyoka ete nakambami kosala eloko moko boye. Mpe wana ekoki kozala liboso na ntongo, nakoki kokende na mpepo na California, kino na Maine to esika moko boye, kaka esika oyo Ye akobenga ngai. Yango nde ntina oyo nabongisaka mibembo ya minene mpe milai te, mpo nakoki kosala yango te. Lotomo na ngai ebongisami lolenge wana te, mpe ezali na yango ndenge mosusu.

<sup>7</sup> Mpe sikawa nazongi ndako mpo na kopema mwa moke. Nabungisi kilo zomi, na liyangani oyo ya nsuka. Mpe Ndeko Mercier ná Ndeko Goad bazalaki wana, kala mingi te, mpe balobaki: “Ndeko Branham, namoni eloko oyo osalaka. Otiaka motema na yo mobimba na kati ya likambo yango.”

<sup>8</sup> Nalobaki: “Yango nde lolenge bobele moko oyo okoki kosala mosala ya malamau mpo na Nkolo, ezali kotia mpenza na esika

ya liboso nyonso oyo ozali na yango mpo na Klisto; makasi na yo nyonso, elimo na yo nyonso, motema na yo nyonso, makanisi na yo nyonso, nyonso oyo ozali na yango.” Ntango ozosala eloko moko, sálá yango malamú mpenza, to kosala yango ata moke te, omoni, tika yango kimia. Soko okozala Moklisto, tia nyonso oyo ozali na yango epai na Klisto, elingi koloba, ntango na yo, likabo na yo, nyonso oyo ya yo.

<sup>9</sup> Nazali kotala elenge mobali oyo. Wana nde mwasi na yo, Ndeko Burns, ezali bongo, bazalaki kobeta miziki mpe koyemba kuna, bilenge babalani wana. Mpe—mpe ezali piano te, ezali mpe orgue te, kasi ezali lolenge moko boye ya nzenze, bazali kopalola eloko moko likoló na yango, mpo na kosala eloko moko mpo na Nkolo. Ntango mosusu okoki kosala yango, mpe koyemba, komema milimo bándima. Sálá eloko moko, ézala nini. Soki o—oyebi kobeta piolóló, ee, béta piolóló. Sálá kaka eloko moko. Tátola kaka to sálá eloko moko mpo na Bokonzi na Nzambe. Oyo nyonso ozali na yango, tiá yango na mosala na Nzambe.

<sup>10</sup> Sikawa, tokomeka koumela ntango molai mpenza te, mpo nayebi ete bosálaka. Bosengeli kolamuka ntongo-ntongo. Mpe nakendeke bokila ya biséndé na ntongo nyonso. Nakoyebisa bino kaka solo. Yango nde nasalaka. Yango nde ntina oyo nazongi awa, ezali mpo na kopema moke. Na boye nalamukaka, pene na ngonga ya minei, mpo na kokende na zamba mpe, ee, kosala bokila mwa moke mpe kolala. Mpe nakomi kozua lisusu mwa kilo yango, boye, nakopema, nsima na mwa ntango, soki bino . . . Nkolo alingi. Mpe nyonso ezali malamú.

<sup>11</sup> Malamú, sikawa, tokofungola ba-Biblia na bino. Nalingi ete bóyáka na ba-Biblia na bino mpokwa nyonso, mpo bó . . . ndenge bokokoka. Soko moto moko azangi, soki ezali na baoyo bakolinga kolanda botangi ya makomi, tozali na ndambo awa, mpe tokosenga na . . . basungi mosusu ete bákabola yango. Moto moko azali na mposa ya moko? Boye, tómbola bobele loboko.

<sup>12</sup> Nazali komituna soki Ndeko . . . Doc, yaka awa mpe zwa ba-Biblia oyo. Ozali penepene kuna, mpe Ndeko Burns. Ezali solo, Burns? Nayokaki ye koloba . . . [Ndeko alobi: “Conrad.”—Mok.] Nini? [“Conrad.”] Conrad. Nabengaki ye . . . Nazokóma na mwa kokoso ya koyóka, ntango mosusu, Ndeko Neville. Nazwaki nkombo ya Burns ndenge nini? Nayebi elongi ya moto yango, kasi nazokoka te, nazalaki kokoka kotángá nkombo na ye te.

<sup>13</sup> Mpe boyebi, na ntango obandi kokóma mwa mokólo, nayebi komona eloko moko, ezókómela ngai mpasi mpenza kotángá Biblia oyo. Mpe nayinaka mpenza likanisi oyo ete esengeli nálata manéti, mpo na kotángá Biblia.

<sup>14</sup> Kasi, awa kala mingi te, nakanisaki ete nabandaki kokufa miso. Mpe nakendeke komona Sam. Mpe Sam alobaki: “Bill, nayebi te.” Alobaki: “Nakokutanisa yo ná ngangá-mayeke moko ya miso.”

<sup>15</sup> Nakendeki na Louisville. Esengelaki kozala mokano na Nkolo. Nganga-mayele moko ayébáná; nabosani nkombo na ye sikawa. Kasi asilá kotanga buku na ngai. Mpe alobaki: “Soki esalemi ete ózóngá na Afrika, nakolinga kokende elongo ná yo.” Alobaki: “Mpe soki yo. . . Bato ya Afrika balingaka yo.” Mpe alobaki: “Bazali na bikilá-kila mingi, koleka mingi oyo etali mbeli ya monganga, mpo na kosala lipaso. Boye,” alobaki, “nalingi kopesa sánzá motoba ya bomoi na ngai, mpo na kosala lipaso ya bokono ya cataracte mpe makambo mosusu, na. . . na elanga ya mosala.” Mpe alobaki: “Soki tokoki kokende elongo, mpe bango bakoki kosepela na yo, ndenge wana,” alobaki, “na bongo soki bazali na bokono ya cataracte mpe oyo etali miso,” alobaki, “nakolinga kosalisa yango, ofelé, mpo na sánzá motoba.” Nabosani ntango boni osengeli kozela mpo na kokutana ná ye.

<sup>16</sup> Tofandaki na mwa eteni ya ndako mpe mwa—mwa mwinda moko ya motane epelaki, kuna na eteni ya ndako ya molili. Bongo, nakokaki kotanga mikanda yango. Epesaki ntuku mibale-ntuku mibale. Nakokaki kotanga yango na ngambo nyonso. Akitisaki yango na zomi na mitano-zomi na mitano, mpe nakokaki kotanga yango. Akitisaki yango na zomi-zomi, mpe nakokaki kotanga yango. Alobaki: “Boye, miso na yo ezali na mindondo mingi mpenza te.”

<sup>17</sup> Boye azalaki na mwa telescope moko. Atiaki mwa eloko moko kuna na nsima, mwa eloko moko, boyebi. Ba-telescope ya kala, bato boni bayebi yango lisusu? Tozaláká kotala na nzela na yango, kotala bilili, ndenge wana mpenza. Mpe alobaki: “Okoki kotángá yango?”

Nalobaki: “Iyo, mesie.”

Alobaki: “Tángela ngai yango.”

<sup>18</sup> Ezalaki na, oh, na paragraphe mobimba, ya monene *boye*. Nabandaki, natangaki yango; abandaki kobenda yango pembeni, *boye*, nakómaki kotanga malembe malembe. Akómaki pembeni lokola *boye*, natelemaki. Alobaki: “Nakoki koyebisa yo likambo moko, olekisi mibu ntuku minei.”

Nalobaki, “Iyo, ezali solo, eleká na yango kala.”

<sup>19</sup> Alobaki, “Osalaki yango ndenge nini?” Alobaki: “Liso ya moto, ndenge esalémá, ntango okokisi mibu ntuku minei, lokola nsuki na yo ebandi kokóma mpembe, mpe bongo na bongo, mbuma ya liso ekomaka pápálá.” Alobaki: “Sikoyo, soki okobi kozala na bomoi ntango molai, ekozonga lisusu.” Alobaki, “Yango nde komona ya mibale, ndenge babéngaka yango. Kasi,” alobaki, “moto, pene na mibu ntuku minei, akómaka mpenza. . . .” Alobaki: “Eloko moko te ezali mabe ná miso na ye.”

<sup>20</sup> Nakoki—nakoki komona nsuki moko, soki ezali na mabelé, oyo ezali mosika na ngai. Kasi soki ekómi pene na ngai. . . Mpe alobaki, “Sikawa, ntango otángaka Biblia na yo,” alobaki,

“opusaka yango mosika na yo.” Alobaki: “Nsima na mwa ntango, loboko na yo ekozala lisusu molai mpenza te, na lolenge ete okokoka—okokoka kozongisa yango mosika mpenza te mpo na kosimba yango.”

<sup>21</sup> Na bongo abongiselaki ngai manéti, mpe na eteni ya nsé okoki, ezali mpo na kotanga. Alobaki: “Sikawa, na eteyelo na yo. . .” Akanisaki ete nazali moko na batei ya lokumu oyo, boyebi. Na bongo alobaki ete e. . .yo. . .Eteni ya likoló ezali kaka tala-tála ya lininisa, kaka lokola tala-tála nyonso. Mpe eteni ya nsé ezali lokola bapaloli kati na yango, mpo nákoka kotánga yango penepene, boyebi, ndenge *wana*. Boye nalingaka mpenza kolátá yango te; ya solo mpenza.

<sup>22</sup> Sikawa, na malakisi ya Biblia, nazali na Kondimana na Sika na mpokwa oyo. Boye ezali. . .Nazali na kondimana na Sika ya Collins mpe ezali na komá malamú ya minene. Kasi sikawa, ntango nakozongela oyo mosusu, na—nakosengela ntango mosusu kozua manéti oyo ya kala, mpe—mpe nakomeka kotanga na yango. Kasi ézala ata nini, na—nasepeli ete nazali na eloko moko oyo na—nakoki naino kotanga. Mpe—mpe—mpe nyonso oyo nazali na yango, nakopesa na moto nyonso, nyonso oyo nakoki kopesa, mpo na nkembo na Nzambe, nazolikia ete Akolongola elembo ya kokólá wana. Nakoki kosenga te ete Álongola mibu na ngai. Ngai. . .Iyo, yango nde eloko moko oyo biso nyonso tosengeli kosala. Tosengeli koleka na yango. Mpe nayebi ete nazali lisusu mwana moke te ndenge nazaláká kotelema awa na eteyelo. Nakomi na mibu ntuku minei na mwambe. Mpe bókanisa naino, nsima na mibu mibale, nakokóma na mibu ntuku mitano, Ndeko Mike.

<sup>23</sup> Oh la la, nazondima yango na mpasi mpenza! Ngai. . . Nayebaki ata moke te ete nasílaki kolekisa mibu ntuku mibale, kino eleki pene na mibu mibale. Ya solo. Ya solo. Ngai. . . Nakokaki kondima yango te. Ata sikawa na—na. . . Ezali mpasi mpo na ngai kondima yango, kino ntango namitalaki na tala-tála, nde na—nayebi ete ezali bongo. Kasi—kasi kaka na kotala, nazomiyoka malamú, kaka ndenge natikálá komiyoka na bomoi na ngai, mpe nazozongisa matondi mpo na yango, mpe. Masánzoli nyonso ézonga na Nzambe.

<sup>24</sup> Sikawa, tozoyekola Buku ya Baebele. Ezalaka. . .Oh, ezali moko na ba-Buku ya bozindo koleka, ya makambo koleka, na Biblia. Nakoyebisa bino, ezali Buku oyo na bosolo eko. . .Soki Nzambe apesi nzela, tokokóta na kati na yango mpenza, nandimi ete tokozwa mabanga ya wolo kino tokoganga mpo na kopesa lokumu na Nzambe ntango nyonso. Mpe sikawa na. . .

<sup>25</sup> Buku ya Baebele, na bosolo, oyo Yango ezali, eyebani ete Ekomamaki na Santu Paulo, Molakisi ya monene koleka ya Biblia, nabanzi, oyo mokili etikalá kozwa, libanda na Nkolo Yesu Klisto. Mpe Paulo azalaki kokabola. . .Sikawa, Paulo azalaki

molakisi ya solosolo ya Biblia; elingi koloba, Kondimana na Kala. Yango nde Buku kaka moko oyo ekomamaki na eleko wana, babengi Biblia. Mpe azalaki koluka kotalisa na Baebele, kokabola Kondimana na Kala mpe kolakisa ete Kondimana na Kala ezali elilingi to etaliseli ya oyo na Sika.

<sup>26</sup> Kaka wana mpenza tokoki kofandisa lisolo mpe kotikala wana sánzá misato, na likanisi moko wana, mpenza wana. Mpo na kozonga kuna, soki tokoki kofungola ba-Biblia na biso sikawa, na bosolo tozali na kati ya Baebele, mokapo ya 1. Kasi soki tokei na Emoniseli, mokapo ya 12, bokomona yango lisusu malamumu mpenza, bililingi yango. Soki. . . bino baoyo bozali na bikomeli na bino mpe bolingi kokoma Makomi. Na Baeb- . . .

<sup>27</sup> Na Emoniseli 11, tomoni ete Yoane, na esanga ya Patamo, amonaki mwasi moko ateleme na likoló, azalaki na mói na motó na ye mpe sánzá na makolo na ye. Mpe mwasi yango azalaki na mpasi ya kobota, mpo na mwana ábótama. Abotaki mwana mobali. Dalagona motane atelemaki, mpo na kolia mwana yango kaka na ntango oyo abotami. Mpe mwa—mwana yango anetolamaki na Likoló, mpe mwasi yango akimaki na lisobe epai wapi aleisamaki mpo na ntango, ntango mpe ndambo ya ntango, to kokabwana ya ntango.

<sup>28</sup> Sikawa, mwasi yango atalisaki lingomba, mpe Mwana oyo ye abotaki azalaki Klisto. Sánzá na nsé ya makolo na ye ezalaki mobeko, mpe mói na motó na ye ezalaki ngolu. Minzóto zomi na mibale na motole na ye ezalaki bantoma zomi na mibale. Mpe kuna nde esika, na oyo. . . Bayekoli zomi na mibale bazalaki nkembo to motole ya Kondimana na Sika. Bomoni? “Mpo ete mibóko mosusu ekoki kotiyama te, bobele oyo esili kotiyama.” Bomoni? Yango, Mobóko, ko—Kondimana na Sika, bantoma, Malakisi ya bantóma, mpe bongo na bongo, ezali motole ya mobóko mpo na Kondimana na Sika. Mpe lisusu, na . . .

<sup>29</sup> Sánzá ezali elilingi ya mói. Mói etalisaka bobele pole na yango ntango ezalaka nsima na mabelé. Mpe sánzá epesaka pole, mpo na kotambola, na butu. Mpe tozali na elilingi ya malamumu awa, elilingi mosusu ya kitoko: mói etalisaka Klisto; sá—sánzá etalisaka Lingomba. Bazalaka mpenza lokola mwasi ná mobali. Mpe ntango Klisto azali te, Lingomba engengisaka pole ya moke, Nsango malamumu. Mpe e—ezali Pole ya kotambola kati na yango kino Mwana akobima lisusu, na nsima Lingomba ná Mwana, sánzá ná mói, ekosangana elongo. Bomoni? Sánzá ezali eteni ya mói, mpe Lingomba ezali eteni ya Klisto. Mpe ntango Klisto azali te, Lingomba engengisaka Pole na Ye. Na bongo, kaka mpenza ndenge tokoki komona sánzá kongenga, eyebaka ete mói ezali kongenga esika moko. Mpe ntango nyonso oyo Lingomba ezali kongengisa Pole ya Klisto, Klisto azali na bomoi esika moko boye. Amen. Bókanisa naino.

30 Sikawa, mobeko ezalaki etaliseli ya ngolu, kasi mobeko ezalaki na nguya ya kobikisa na kati na yango te. Mobeko ezalaki kaka . . . Mobeko ezalaki polisi. Polisi atiaki yo na boloko, kasi, bomoni, esengélaki na ngolu mpo na kobimisa yo na boloko. Bomoni?

31 Boye Makila na Klisto, Nsango-malamu, ekangolaka biso na masumu. Mobeko ekomisaka biso kaka basumuki. Mobeko elobaki bobele: “Ozali mosumuki. Okoyiba te. Okosala ekobo te. Okopesa litatoli ya lokuta te.” Bomoni? Ezali polisi oyo elobaka ete ozali na libunga mpe okweisami. Kasi Nsango-malamu ezali nsango ya malamumu. Klisto akufaki mpo na kobikisa biso na mabe na biso nyonso, ya kobuka mobeko. Klisto akufaki mpo na kobimisa biso na nyonso wana.

32 Sikawa, Paulo, kaka ntango abongwanaki, atikalá kotuna na likindo moko te, atunaki mpe batei moko te. Kasi bomonaki? Akendeki na Arabia, mpe azalaki kuna mibu misato, na Arabia. Sikawa, oyo ezali, na ndenge na ngai ya komona, ete . . .

33 Sikoyo, esengeli na biso kotia mobóko na likambo oyo, mpo tóyeba ntina mpenza oyo yango ezali. Mpe liteya ya liboso, na mpokwa oyo, tokotia mobóko na biso.

34 Sikawa, Paulo azalaki molakisi monene ya Biblia, mpamba te ayekolaki na makolo ya molakisi monene ya lokumu ya ntango nyonso, Gamaliele. Mpe azalaki moko na bato oyo bayebanaki mingi koleka, na eleko yango, molakisi monene wana ya mibeko mpe basakoli. Bongo, Paulo atangisamaki malamumu na makambo yango.

35 Na bongo nalingaka ye ndenge wana, emoniseli monene oyo, ndenge azalaki sembo na motema na ye, mobomi na bato, andimaki ete báboma Stefano mpe amonaki Stefano kokufa na nsé ya mabanga ná mabelé, wana babambaki ye mabanga kino kufa. Nakanisi etungisaki mpenza makanisi ya Paulo ntango amonaki Stefano kotombola maboko na Likoló mpe koloba: “Namoni Likoló kofungwama. Namoni Yesu atelemi na loboko ya mobali ya Nzambe.” Mpe alobaki: “Tata, kotángela bango lisumu oyo te.” Mpe alalaki mpongi.

36 Bomonaki yango? Akufaki ata moke te. Alalaki nde mpongi. Kaka ndenge . . . Nandimi te ete atikalaki koyoka libanga mosusu. Kaka lokola mwana moke na ntólo ya mama na ye alálaka mpongi, Stefano alálaki mpongi na maboko ya Nzambe.

37 Ezali na eloko moko, na ntina na Paulo, oyo etungisaki mpenza makanisi na ye. Na bongo ye, lokola moto nyonso oyo akweisami, mpe azali koluka kobundisa Yango, akendeki epai ya nganganzambe mokonzi mpo na kozwa mikanda. Alobaki: “Nakokanga bato nyonso oyo bazali kosala makelele nyonso wana, mpe bapéngwi wana;” oyo bazalaki komonana lokola, oyo tokoki kobenga lelo, “ba-fanatiki ya makasi,” to eloko moko

ya ndenge wana, bazosaláká makelele mingi mpe kotia mobulu. “Tokokende kuna mpo na kosukisa yango.”

<sup>38</sup> Mpe ezalaki ye na nzela, mwa . . . nzela monene te, lokola oyo tosalaka na yango mibembo. Mpe banzela wana na Palestina, ezalaki kaka mwa banzela mike, lokola nzela ya bangombe kati na matiti, epai bangombe, bampate, bampunda, bambalata, mpe ba-kamela ezalaki kokende likoló na bangomba.

<sup>39</sup> Mpe Paulo, ntango azalaki kokende na Damaseke, pene na midi, mokolo moko, Pole moko monene engengaki mpe ekweisaki ye na mabelé. Moto moko te amonaki Yango, bobele Paulo. Nalingi bómona yango. Mpe kaka awa, oyo ezali mpo na ngai moko te, kasi kaka mpo tókende kino na mobóko oyo. Mpo bóyeba ete bobele Yesu moko wana . . .

<sup>40</sup> Sikawa, ntango Azalaki awa na mokili, Alobaki: “Nauti epai na Nzambe, mpe Nazali kozonga epai na Nzambe.”

<sup>41</sup> Sikawa, ntango Akambaki bana ya Yisraele, Azalaki Likonzi na Móto. Mpe Akómaki mosuni, na nsima Azongaki lisusu na Likonzi na Móto yango moko. Mpe ntango Akutanaki na Paulo na nzela ya Damaseke, Azalaki Likonzi na Móto wana, Pole wana, bomoni, Pole monene. Mpe Paulo alobaki: “Ezali Nani oyo ngai nazali konyokola?”

<sup>42</sup> Alobaki: “Ngai Yesu, Oyo ozali konyokola,” Pole yango. Oh, Azali malamumu mingi, boye te?

<sup>43</sup> Mpe tala Ye oyo, na mpokwa oyo, awa, elongo ná biso mpenza. Atikaki ete bákanga Ye fotó kuna, Eloko yango moko, bomoni, Likonzi na móto, Pole, kaka ndenge Azalaki, “Motindo moko lobi, lelo mpe libela.”

<sup>44</sup> Sikawa, bato oyo bazalaki elongo ná ye bamonaki Pole yango te, kasi Ezalaki wana, bobele ndenge moko. Epesaki mbano ndenge moko.

<sup>45</sup> Sikawa, ekoki kosalema ete—ete moto moko ámona Klisto kati na ndako oyo mpe moto mosusu moko te ámona Ye? Na ntembe te. Esalemaki kuna.

<sup>46</sup> Esalemaki mpe na butu moko, ntango Petelo azalaki na boloko. Mpe Pole wana ekotaki na kati ya boloko, esimbaki Petelo, etambolaki mpenza pembeni na basinzili ya kati, basinzili ya libanda, elekaki na ekuke, ekuke ya monene, mpe ekuke ya engumba. Petelo alobaki: “Esengelaki kozala ete nazalaki kolota ndoto.” Kasi atalaki zingazinga, kasi Pole yango esilaki kolimwa; Klisto, Pole wana ya Seko mpe ya libela. Tala Ye wana. Sikawa, kuna na nzela . . .

<sup>47</sup> Mpe bótala, likambo mosusu, soki tokoki kolobela yango, eyei na makanisi na ngai. Kasi bato na mayele oyo balandaki Monzóto, nzela nyonso longwa na India, na Monyele, basánzá, balekaki na mabwaku mpe bisobe (elekaki na bitalelo ya minzoto; mpe bazalaki koyeba ntango, na butu, na nzela ya

minzóto) mpe historien moko te to moto moko te alobá ete bamonaki Monzoto yango, bobele bato na mayele. Bobele bango nde basengelaki komona Yango.

<sup>48</sup> Boye okoki komona biloko oyo moto mosusu akoki komona te. Mpo na yo, Yango ezali ya solosolo. Mpo na ye, bazososola te. Ndakisa, kobongola motema; okoki kobongola motema mpe kosepela na mapamboli ya Nzambe, mpenza—mpenza komela mapamboli ya Nzambe. Kasi moto mosusu, oyo afandi pembeni na yo: “Nazomona eloko te.” Bomoni? Bomoni? Nde bongo. “Nazososola yango te. Nazomona te soki yango ezali nini.” Boye, azososola na ye Yango te. Nsuka wana. Na esika oyo yo ozali kososola.

<sup>49</sup> Bótala sikawa, Paulo, ezalaki ye na nzela kokende kuna. Mpe ntango kaka likambo monene oyo ekomelaki ye... Sikawa, asepelaki te... Yango nde esalaka ete Paulo ázala malamumu mingi.

<sup>50</sup> Sikawa, liteya na biso na mpokwa oyo ezali bozito te. Ezali liteya ezangi bozindo, kasi, oh, tokokóta na bozindo, nsima ya mwa ntango. Kasi oyo ezali mpenza liteya moko ezangi bozito, kasi ezali kaka kobanda. Mpe oyo yango ezali, ezali eloko bobele moko, ezali kotombola Yesu Klisto. Paulo, mpo na kobanda.

<sup>51</sup> Mpe liboso ete ásala likambo oyo, Paulo azalaki moyekoli ya Biblia. Mpe moyekoli ya Biblia akotikaláká kofandisa malakisi na ye likoló na makambo oyo abikeli te. Te, mesie. Bakotikaláká kofandisa malakisi na bango likoló na makambo oyo babikeli te. Okoki kobikela makambo ya ndenge na ndenge. Kasi esengeli kozala YANGO ELOBI NKOLO. Ya solo.

<sup>52</sup> Sikawa, na Kondimana na Kala, bazalaki na ndenge misato oyo bakokaki koyeba nsango moko. Ya liboso, mobeko, oyo wana ezalaki bobele mobeko. Na nsima, bazalaki na—na mosakoli; molóti ndoto; mpe bazalaki na Urimi Tumimi. Sikawa oyo wana ekoki kozala na mwa bozindo.

<sup>53</sup> Urimi Tumimi ezalaki elamba ya ntólo oyo Alona azalaki kolata na ntólo. Na kati na yango, ezalaki na mabanga zomi na mibale: jasipe, salali, balekete, mpe bongo na bongo, kokita. Bazalaki na mabanga minene nyonso zomi na mibale, oyo ezalaki kati na elamba na ntólo, kolakisáká ete azali nganganzambe monene ya mabota nyonso, mabota zomi na mibale ya Yisraele. Elamba na ntólo oyo ezalaki kotiamama likoló na likonzi kati na losambo. Mpe ntango mosakoli moko asakolaki, mpe balingaki koyeba mpenza soki ezalaki ya solo, to te, basakoli to baloti ndótó bazalaki kotelema liboso na Urimi Tumimi, mpe azalaki koloba ndóto na ye to emononeli na ye, nyonso oyo amonaki. Mpe soki Pole ya Bulee. . . Oh, bomoni yango? Nzambe afándaka ntango nyonso kati na mosanda ya likamwisi. Lisanga na yango, ba-pole yango, ezalaki kaka malamumu bongo, kino ete mongongo yango éyokana. Mpe ntango mongongo ebeti mabanga wana,



soki ezalaki likamwisi te, ezalaki kofanda nye. Kasi soki ezalaki likamwisi, ba-Pole yango nyonso ezalaki kongengisa langi ya monama elongo. Amen. Na bongo, wana ezalaki Nzambe koloba: “Wana azali mosakoli na Ngai.” To, “Ndoto wana euti na Ngai.” Bazalaki kokata likambo kokokana na Urimi Tumimi.

54 Boyebi lisusu Saulo, ntango azongaki nsima? Alobaki ete akokaki lisusu kolota ndoto te. Mpe mosakoli, Samwele, asilaki kokufa, mpe nzela mosusu ezalaki te. Alobaki: “Ata Urimi elingi ata koloba na ngai te.” Eloko moko te. Saulo atelemaki liboso na Urimi, mpe maloba na ye epesaki mbano te. Bomoni? Nzambe aboyaki ye. Mpe Urimi Tumimi yango ezalaki kondimisama ya bonganga ya Alona. Nsima na Alona kokende, Mose, eta—etando yango etiamaki likoló na likonzi.

55 Sikawa, bonganga ya Alona esilaki ntango Yesu akufaki. Mpe sikawa, na kokaboláká mobeko na ngolu, tozali kaka na Urimi Tumimi. Mpe Paulo azalaki kosalela Yango. Bomoni? Urimi Tumimi, lelo, ezali Liloba na Nzambe oyo Ekufaka-te, ya Seko, ya libela. Bomoni?

56 “Mpo moto nyonso akolongola eloko moko na Buku oyo, to akobakisa eloko moko na Yango.” Nalingi eloko moko te libanda na Yango, kasi nalingi nyonso oyo Ezali na yango. Yango nde Lingomba oyo tolingi. Mpe makambo nyonso esengeli kondimisama na nzela na Liloba.

57 Yango nde ntina oyo nayambamaki malamumu te, kala mingi te, epai ya bato ya Pantekote, mpo nalobaki: “Nakokaki kososola te ete mafuta kobima yo na maboko, to makila kobima yo na elongi, ézala elembo ete ozali na Molimo Mosanto.” Wana ezali Makomi te mpe na—nakokaki kondima yango te. Esengeli kouta na Liloba.

58 Mpe sikawa, Paulo, alingaki mpenza Liloba. Boye, liboso ete átatola mpenza likambo monene oyo abikelaki, akendeki na Ejipito mpo na mibu misato. Nandimi ezalaki mibu misato, mibu misato na Ejipito. Mpe boyebi oyo nandimaka ete asalaki? Nandimi ete azwaki kondimana na Kala, mpe alukaki-lukaki kati na Kondimana na Kala, mpe amonaki ete Yango ezalaki mpenza Masiya. Asengelaki kondimisa likambo oyo abikelaki na nzela ya Biblia. Amen. Oh, la la!

59 Bótala ye ntango azalaki na boloko. Bótala, e—eteni moko ya bomoi ya Paulo elekaki ntango asalaki ntango molai kuna na boloko. Akomaki Buku ya Baefese. Akomaki Mokanda ya Baebele oyo. Bomoni? Azalaki na ntango. Nzambe atiaki ye pembeni, kuna na boloko, mpe akomaki Mikanda oyo na mangomba. Moko na lingomba ya Baefese. Akomaki moko epai ya lingomba Pantekote, azalaki na kokoso mingi ná bango. Ná lingomba Pantekote nde azalaki na kokoso mingi, koleka ná moto mosusu nyonso. Ezali bongo kino lelo. Kasi azalaki kozongisa matondi mpo na bango. Eloko bobele moko oyo

akokaki kolakisa bango. . . Ntango bazalaki kosangana: moko azalaki na monoko ya sika, moko azalaki na loyembo, moko azalaki na koningana, moko azalaki komiyoka ndenge. Akokaki te koyebisa, koteya bango “kobatelama ya Seko.” Akokaki te koteya bango “kobongisama liboso.” Akokaki kosolola na bango te, bazalaki ba-bebe. Bango nyonso basengelaki ko—basengelaki koyoka eloko moko na nzoto, to komona eloko moko, to komiyoka ndenge, mpe, to koyoka eloko moko zingazinga na bango, ba-ndanga moko boye.

<sup>60</sup> Kasi nandimi ete, ntango alobaki na Baefese, akokaki koloba ete “Nzambe asilaki kobongisa biso liboso mpo na kozala bana mbali mpe bana basi, mpe apesi biso lokumu ya bana kati na Yesu Klisto liboso ya kozalisama ya mokili.” Bótala oyo wana. Oh la la!

<sup>61</sup> Bótala ye koya na Buku ya Baloma, mpe bongo na bongo. Bazalaki mikolo. Oh, balobaki minoko ya sika, ya solo, mpe bazalaki na bilembo mosusu ya Molimo Mosanto katikati na bango. Kasi basalaki malakisi te, mpe komiyoka ndenge, mpe mwa kolenga nzoto, mpe komiyoka moko boye.

<sup>62</sup> Paulo alobaki: “Bo—bo—bolekisi ndelo ná likambo yango. Na ntango oyo bosengelaki kozala balakisi, bozali naino bana mike mpe bosengeli na miliki.”

<sup>63</sup> Sikawa, yango nde oyo namekaka kobunda ntango nyonso ete tabernacle oyo ézala etonga ya ba-bebe te. Tózala baoyo basili kokóla. Bótelema na nzela. Oh, la la! Yango wana nde.

<sup>64</sup> Boye, Paulo akei kuna, liboso, komona soki likambo abikeli ekokani ná Biblia ya Nzambe.

<sup>65</sup> Oh, elingaki te kozala malamumu mingi, lelo, soki bato bakokaki lisusu kosala bongo, soki tosali ete likambo tobikelaka ékokana na Biblia ya Nzambe? Soki ekokani te, na bongo kobikela na biso ezali na malamumu te; ezopela-pela te kati na Urimi Tumimi. Soki epeli-peli kati na Yango, amen, oyebi ozali na Yango. Kasi soki epeli-peli te, mwa. . . Etali ngai te malamumu ndenge nini yango emonani, ndenge nini emonani lokola ete ezali malamumu mpenza; soki miinda wana epeli-peli te na Ulimi Tumimi wana, ezalaki lokuta.

<sup>66</sup> Etali te makambo boni obikélá, boniboni emonani lokola ete ezali solo, boniboni ezobeta miso, boniboni ezali eloko ya kopesa mayele, ete ezali esalelo monene mpo na kolonga milimo; soki epeli-peli te kati na Liloba, ezali lokuta. Ya solo. Esengeli kokokana ná Liloba.

<sup>67</sup> Sikawa, nandimelaka. . . kati-kati ya nzela ezalaka. Nzela, sikawa, mbala mingi. . . Nazaláká kokende na losambo moko ya ba-Nazareen. Nkolo ápambola bato balamu wana. Bazali ba-Methodiste ya lolenge ya kala, oyo babulisámá; ba-église de Dieu, ba-Nazareen, ba-Pèlerin de la Saintété, mpe mangomba malamumu

mingi ya bosantu, mpe ya kala wana. Mpe bazaláká koyemba loyembo moko:

Nazali kotambola na nzela monene ya kala,  
Koyebisa bipai nyonso nakokende,  
Malamu názala Moklisto ya kala, Nkolo,  
Koleka nyonso oyo nayebi.

68 Malamu. Malamu mingi. Mpe bazaláká koloba na ntina na nzela monene ya bulee. Sikawa, soki botáangi likambo yango, bazwi yango na Yisaya, mokapo ya 35. Sikoyo, soki botali, alobaki: “Nzela monene ekozala, *mpe* nzela.”

69 Sikawa, *mpe* ezali likangisi. Bomoni? Nzela monene, ezalaki nzela monene ya bulee te. “Ekozala na nzela monene, *mpe* nzela, mpe ekobiangama ‘Nzela na bulee,’” nzela monene ya bulee te. “Nzela na bulee!” Mpe nzela ya balabala ezalaka na kati-kati ya balabala. Etongamaka *boye* mpo mai é sukola bosoto nyonso, na ngambo nyonso mibale, mpo na kobatela balabala mpeto. Bokolinga te ete, bokozala na mai eteleme na balabala, ntango nyonso, soki etongami malamumu te. “Nzela” ezalaka na kati-kati ya balabala.

70 Sikawa, na ngambo *oyo*, ntango bato babongwani, makanisi na bango etiami semba na Klisto. Mpe soki bazali kaka na mwa mayele ya kelasi, mpe baumelaka na mabondeli te, bakokóma mpenza malili, na motema makasi, na zololo, mpe bazangi kotia motema na makambo. Na bongo soki bazali bobele mwa na motema mótomóto, soki bokebi te, bakokóma makambo makasi mpe mobulumobulu, na ngámbo *oyo*, bomoni, bakokoma na koningana ya nzoto mpe nyonso wana.

71 Sikawa, kasi, Lingomba ya solosolo ezali mpenza Nsango Malamumu ya peto solosolo, mpenza na kati-kati ya balabala. Ezali malili mpe zololo te, ezali mpe bindima-ndima te. Ezali Nsango-malamumu ya kala, ya kitoko solo, ná móto ya bolingo na Nzambe koyokana na motema, ékotamboláká mpenza na kati-kati ya balabala, kobengáká longwa na bangámbo nyonso mibale. Ya solo. Sikawa, yango nde oyo. . . Mpe ndenge nini bokozwa Lingomba yango? Longwa mpenza na Liloba, Urimi Tumimi.

72 Sikawa, Paulo alingaki komema lingomba yango na katikati mpenza ya balabala, boye akendeki mpe ayekolaki mibu misato, na ntina na Makomi oyo ye ayebaki. Yango wana, Paulo akomaki eteni monene koleka ya Kondimana na Sika. Nzambe atindaki ye ete ásala yango, mpo eleko ya Mabota ezalaki koya. Matai, Malako, Luka, mpe Yoane, Nsango-malamumu minei, bazalaki Bayuda. Kasi Paulo akomaki mingi ya mikanda yango.

73 Sikawa bótala, sikoyo, tokobanda kokóta na mobóko yango sikawa, epai wapi azali, kokomáká Yango, uta na boloko. Mpe abikelaki likambo oyo nyonso. Kasi, ya liboso, likambo oyo abikelaki endimisamaki liboso, mpe oyo nde mokanda na ye ya

ntina na likambo. Oyo nde mokanda na ye ya ntina na likambo. Baroma mpe Baefese, mpe bongo na bongo, ezali na esika na yango, kasi oyo nde mokanda na ye ya ntina na likambo.

<sup>74</sup> Sikawa, mokapo mobimba ya 1 *ezali* kotombola Yesu, mpe kotalisa bokeseni kati na Ye ná mosakoli. Yango nde mama na likambo sikawa. Nakomeka kokende na likambo yango nokinoki mpenza, mpo toumela ntano mingi te. Mama na likambo *ezali* kotalisa bokeseni mokap- . . . ya sika . . . Mokapo ya 1 *ezali* kotalisa bokeseni kati na Yesu ná basakoli nyonso, to mibeko nyonso, to bongo na bongo, mpe ezali kotalisa Nani Yesu azali. Sikawa bótala: “Nzambe.” Tóbandi na liloba ya liboso: “Nzambe.”

*Nzambe, na kal- . . . oyo na ntango ya kalakala . . . kalakala* elingi koloba “eleki ntango molai,” nkala mpenza.

*. . . na ntango ya kalakala mpe na ndenge mingi, asololáki na batata na nzela ya basakoli,*

<sup>75</sup> Sikoyo, bomoni, “Nzambe, na ntango ya kalakala, kala mpenza, asololaki na batata na nzela ya basakoli.” Lolenge wana nde Asengelaki kopesa Nsango na Ye, na nzela ya mosakoli na Ye.

<sup>76</sup> Nzambe atindaki mosakoli na Ye, ndakisa: Eliya, Yilimia, Yisaya. Mpe soki botali malamú, ata mbala moko te, na histoire ya mokili mobimba, lingomba ebimísá mosakoli. Boluka-luka kati na Kondimana na Kala, na Kondimana na Sika, to na eleko oyo, na eleko ya nsuka. Bólakisa ngai mosakoli moko, oyo atikálá kobima na lingomba, na eleko ya nsuka. Bólakisa ngai moko, oyo atelé má, oyo abimá kuna. Mpe bólakisa ngai ntango moko, oyo mosakoli moko, mosali ya solosolo ya Nzambe, oyo bibongiseli ya mangomba ya mokili ezangi kokweisa ye.

<sup>77</sup> Bókanisa naino. Yilimia, Yisaya, bango nyonso kati na Kondimana na Kala, bazalaki kokweisa bango. Yesu alobaki: “Bozali kopakola nkunda ya basakoli mpe koyeisa yango pembe, kasi bino nde botiaki bango kuna.” Ezali ya solo.

<sup>78</sup> Lingomba ezali kokóba na yango. Bótala Santu Patrick. Bino ba-Katoliko bolobaka ete azali ya bino. Azali mo-Katoliko koleka ngai te. Ya solo. Kasi bolobaka ete azali ya bino.

<sup>79</sup> Bótala Santu François d’Assise. Bolobaka ete azali ya bino. Azali mo-Katoliko koleka ngai te.

<sup>80</sup> Bótala Jeanne d’Arc. Botumbaki ye na nkoni, lokola ndoki, mpo ete azalaki komona bimononeli mpe azali na molimo. Botumbaki ye na nkoni. Mpe mwasi yango azalaki koganga ete bayokela ye mawa, kasi batumbaki ye na nkoni. Nsima na mibu pene na nkama moko, bamonaki ete azalaki mwasi mosakoli. Azalaki mosali ya Nzambe. Oh, solo, bomipesaki etumbu monene: bokundolaki banzoto ya banganganzambe mpe bobwaki yango na ebale.

81 “Bopakolaka nkunda ya basakoli, kasi bino nde botiaki bango kuna.” Ya solo. Bibongiseli ya mangomba etikálá kobimisa moto na Nzambe te; etikálá te, lelo esali yango te, mpe ekotikáláká kosala yango te. Losambo ya ebongiseli etikálá kozala likambo ya Nzambe te.

82 Lingomba ya kala koleka na mokili mobimba, oyo ekómaki ebongiseli, ezali lingomba Katoliko; Luther nde ya mibale; na nsima Zwingli ayaki; nsima na Zwingli, Calvin ayaki; Calvin, na nsima ba-Anglican, ba-Anglo-Saxon balandaki, na nsima nde lingomba Anglican; mpe Mokonzi Henry ya Mwambe, ntango atombokaki, mpe bongo na bongo; mpe ekobaki kino na ba-Metodiste ya Wesley, mpe ba-Nazareen, ba-Pèlerin de la Saintété; mpe ekobaki kino na oyo ya nsuka, ezali nde Pentekote, nyonso ekómi bibongiseli. Mpe Biblia elakisi polele ete lingomba Katoliko ezali mwasi ya—ya bomoi ya mbindo, mpe mangomba ya Protestant ná bibongiseli na bango bazali bana na ye ya basi, Emoniseli 17. Ezali mpenza bongo. Boye bazali . . .

83 Bato te, sikoyo. Bato malamumu bazali na mangomba nyonso wana; basantu, bato babikisami. Kasi Nzambe abengaka bato na Ye na nzela ya ebongiseli te. Abengaka bango lokola moto na moto. Nzambe asalaka na moto na moto, ózala Metodiste, Batiste, Protestant, mpe Katoliko, to ózala nini. Nzambe, liboso na kozalisama ya mokili, ayebaki yo, mpe abongisaki yo liboso mpo na Bomoi na Seko, to yo obongisamaki liboso mpo na kobunga ya Seko. Ezali te . . .

84 Alingaki te ete yo ósengela kokufa, yo ókoka kokufa. Kasi, Ye lokola azali na nsuka te, Asengelaki koyeba nsuka longwa ebandeli, soki te Azali Nzambe te. Boye Yesu atikálá koya na mokili te mpo na koloba: “Ee, Nakotala soki moto moko akoyoka mawa. . . Soki Ngai nasali mosala mpe nakufi, na lolenge ya mpasi, ntango mosusu bakokanisa: ‘Boye, Na . . .’ Eko—ekondimisa mitema na bango, mpe bako. . .” Nzambe atambusaka makambo na Ye ndenge wana te.

85 Yesu ayaki na ntina bebele moko, ezali, mpo na kobikisa baoyo Nzambe, liboso na kozalisama ya mokili, ayebaki ete bakobikisama. Alobaki bongo. Ya solo. Boye bozali. . . “Ezali te ye oyo alingi, to oyo ye azali kopota mbangu; ezali Nzambe oyo azali kolakisa mawa.” Paulo alobaki yango. Moto yango moko awa.

86 Alobaki: “Yango wana nde Nzambe akokaki koloba, liboso ete Esau to Yakobo ábotama, Alobaki: ‘Nalingi moko mpe Nayini mosusu.’” Liboso ete moko na bana mibali yango ábotama, Nzambe ayebaki ete Esau azalaki moto na zunguluké, mpe Ayebaki ete Yakobo azalaki. . . alingaki bokulútu na ye. Na bongo Ayebaki likambo yango, liboso kutu mokili ésalema. Sikawa, tokomona, nsima na moniti moko, Nani nde ayebaki yango. Mokapo oyo elobeli yango.

Nzambe, . . . na ntango ya *kalakala mpe na ndenge mingi* alobaki. . . na *batata na nzela ya basakoli*,

*Na mikolo oyo ya nsuka alobi na biso na nzela na Mwana na ye, . . .*

Asali nini? “Asololi na biso, na mikolo na nsuka oyo, na nzela na Mwana na Ye.”

<sup>87</sup> Sikawa, na bongo, bokanisi ndenge nini, ete, mosakoli alingaki kozala nini? Tolingaki nde kozala na mosakoli na mokolo ya lelo? Solo mpenza. Alingaki nde koloba na nzela na biso? Solo. Kasi ye oyo. . . Basakoli ya ntango ya kala bazalaki Molimo na Yesu Klisto.

<sup>88</sup> Sikawa, tósembola likambo yango, mpo nandimi te ete ezokóta malamumu. Sikawa, oyo ezali lokola Eteyelo ya Lomingu, boye tolingi kosembola yango polele. Bomoni?

<sup>89</sup> Bótala. Tozwa Molimo na Nzambe oyo ezalaki kati na Mose, na kobonga be mpenza. . . ezali elilingi ya Yesu Klisto. Bato nyonso oyo na Kondimana na Kala bazali bililingi ya ekulusu. Mose, abotamaki na ndenge esengeli, babombaki ye kati na matiti, balongolaki ye na maboko ya baboti na ye, mpe bongo na bongo, mpe azalaki. . . Azalaki mokonzi, to mo—mokambi, mopesi na mibeko, molobeli, nganganzambe. Nyonso oyo azalaki etalisaki Klisto.

<sup>90</sup> Bótala Yosefe, alingamaki na tata na ye, ayinamaki na bandeko na ye, mpe atekamaki na motuya ya palata pene na ntuku misato. Abwakamaki na libulu, lokola nde akufaki; abimisamaki. Kati na monyoko na ye, mopesi masanga abikisamaki, mpe mosali mápa abungaki; miyibi mibale na ekulusu. Na bongo ntango abimaki, amataki uta na libulu yango, mpe atiamaki na loboko ya mobali ya Falo, na mombongo ya monene koleka. . . e—e—ekólo oyo elekaki bikólo mosusu nyonso na mokili. Mpe moto moko te akokaki kokoma epai na Falo soko na nzela na Yosefe te; Yesu afandi na loboko ya mobali ya Nzambe, mpe moto moko te akoki koya epai na Nzambe soko na nzela na Klisto te. Mpe ntango Yosefe azalaki kolongwa na ngwende mpo na kobima, bato bazalaki kokende liboso na ye, kogangáká mpe kobetáká kelelo, koyula kelelo, koloba: “Bokwea na mabolongu! Yosefe azali koya.”

<sup>91</sup> Mpe ntango Yesu akoya, kelelo ekoyula, mpe mabolongo nyonso ekogumbama, mpe ndemo nyonso ekoyambola. Iyo, mesie. Yango nde Azalaki.

<sup>92</sup> Mpe ntango Yosefe akufaki, atikaki ekaniseli mpo na baoyo bazalaki kozela kokangolama.

<sup>93</sup> Nasimbaki sanduku ya kala yango, awa eumeli mingi te, esalemaki na mondolu. Mpe nzoto na ye esengelaki kotikala. . . mikuwa na ye. . . Alobaki: “Bókunda ngai awa te, mpamba te mokolo moko, Nzambe akoya epai na bino.” Azalaki mosakoli.

“Nzambe akoya epai na bino.” Mpe alobaki: “Wana ekobima bino kokende na mokili ya elaká, bómema mikuwa na ngai.”

<sup>94</sup> Mpaka ya Ebele nyonso, ná mikongo ebetami fimbo mpe ékotanga makila, akokaki kotala sanduku yango mpe koloba, “Mokolo moko, tokobima.”

<sup>95</sup> Yesu atikaki ekaniseli moko: nkunda ya polele. Mokolo moko, ntango tokokende na nkunda, mpe balingami na biso, tokoyoka mwa makeléle ya mabelé, ntango bakoloba: “Putulú ya móto na putulú ya móto, mpe putulú na putulú, mpe mabelé na mabelé.” Kasi, ndeko, tokoki kotala na ngambo ya mai na monana, na nkunda moko ya polele. Mokolo moko, tokolongwa awa. Tozokende Ndako. Azali koya. Makambo nyonso ezalaki bililingi.

<sup>96</sup> Bótala Dawidi, aboyamaki na bato na ye moko, alongolamaki na ngwende na bato na ye moko. Lokola mokonzi ya Yelusaleme, batindikaki ye libanda na Yelusaleme na bato na ye moko. Mpe wana ezalaki ye komata na Ngomba na Bilya, atalaki nsima mpe alelaki. Aboyamaki.

<sup>97</sup> Mibu nkama mwambe kobanda wana, Mwana na Dawidi, Mokonzi ya Yelusaleme, afandaki likoló na ngomba mpe alelaki, mpo Aboyamaki.

<sup>98</sup> Wana ezalaki Molimo na Klisto kati na Dawidi. Nyonso ezalaki elilingi kotalisa ekulusu. Basakoli wana kuna bazalaki koloba na Nkombo na Ye. Bazalaki kobika na Nkombo na Ye. Bazalaki kosala makambo na Nkombo na Ye. Ya solo. “Nzambe, na ntango ya kalakala mpe na ndenge mingi, alobaki na batata na nzela ya basakoli, kasi na mokolo oyo na nsuka, na nzela ya Mwana na Ye.”

<sup>99</sup> Boye basakoli mpe bato ya molimo, lelo oyo, bazali bobele etaliseli ya Klisto. Kuna, batelemaki na mobeko, bazalaki kotala. Ngambo oyo batelemi, bazali kotala na nsima, na ngambo mosusu, kati na ngolu.

<sup>100</sup> Ete na Baebele 11, mokapo ya nsuka, namitunaka bongo mbala na mbala. Na mokapo ya nsuka, na eteni ya nsuka ya mokapo ya 11 ya Baebele, ntango azali koloba na ntina na Abalayama. Mokapo monene ya kondima, na nsuka, alobaki: “Batelenganaki ná mposo ya bampate mpe ya bantaba, bazangaki biloko nyonso, mpe bakatamaki na mosumali. Batelenganaki ná esika ya kokende te, bayinamaki, batiolamaki, mpe banyokolamaki. Baoyo mokili oyo ebongi be te na bato ya ndenge wana.”

<sup>101</sup> Bongo, Paulo ateleme mpe alobaki: “Kasi soki ná biso te, bango bakomi na kobonga be te.” Mpamba te bango bazalaki kaka kotala *na* ekulusu, mpe biso tozali kotala *na nzela ya* ekulusu. Tozali na Molimo ya Klisto nsima na Yango kokóma nzoto mpe kofanda kati na biso. Toyei awa na nzela ya Molimo Mosanto, oyo ezali mwango moko ya malamukoleka.

<sup>102</sup> Mpe mbala mosusu, namitunaka eloko nini Boklisto ezelaka lelo. Motei oyo akei na engumba moko asengeli kozala . . .to lingomba moko ya sika, to mokumba moko ya sika, amibengaka mosakoli, akokende kuna, akoloba: “Boye, soki bapesi ngai mbongo mingi. Soki nakoki kozwa motuka ya malamumu koleka. Soki bako . . .Soko lifuti na ngai ekozala kobakisama nsima na sánzá motoba nyonso.”

<sup>103</sup> Bisu nde tosengeli kozua ya malamumu koleka. Tosengeli kozala na bandako ya malamumu koleka. Tosengeli kolata bilamba ya malamumu koleka. Tokosala nini ntango tokotelema liboso na bato oyo batelanganaki, na bamposo ya bantaba mpe bamposo ya bampate, ná bisika ya kolalisa mitó te, kotelenganáká kati na masobe? Mpe soki kaka moto moko atioli bisu, tokobelema mpo na kobima na losambo mpe kozonga lisusu te. Oyo Boklisto esengi lelo. Tosengelaki komiyoka nsoni.

O Nzambe, yokela bisu mawa.

<sup>104</sup> Na eleko wana, Alobaki na nzela na basakoli, kasi lelo oyo, na nzela ya Mwana na Ye. Wana ezalaki liloba ya mosakoli, kuna. Oyo ezali Liloba ya Mwana, lelo. Oh, Nkombo na Nkolo epambolama!

<sup>105</sup> Na elobeli mosusu, soki ozali kotala elilingi, negatif oyo, okoki kosala libunga. Kasi Oyo esili kosukolama, elili ezali polele. Oyo wana ezalaki na nzela na mosakoli; oyo ezali na nzela na Mwana na Ye. Oyo wana ezalaki na nzela ya negatif; oyo ezali na nzela ya positif. Amen. Bomoni yango? Libaku ya kozanga yango ezali te. Ezali eloko na bosolo, lelo na nzela ya Mwana na Ye. Oh, kitoko mingi!

. . .*oyo ye asili atii mosangoli na libula* . . .(Oh, la la!) . . .*mosangoli na libula na biloko nyonso*, . . .

<sup>106</sup> Ezalaki nini? Ezalaki kotiamaki. Oh, boyoka. Atiamaki, Klisto atiamaki mosangoli na libula ya biloko nyonso. Oh, zabolo ayebaki yango, longwa na elanga na Edene, bomoni, ntango zabolo ayokaki Liloba wana kuna, mokolo wana, na kosambisama ya bato wana. Alobaki: “Lokola boutaki na putulú, bokozonga na putulú; mpe Momboto na mwasi ekonyata motó ya nyoka.” Momboto oyo elakamaki.

<sup>107</sup> Satana azalaki ntango nyonso kokengela mpo no Momboto wana. Ntango Abele abotamaki, alobaki: “Ozwami, wana nde momboto yango.” Mpe abomaki Abele. Mwana na ye, Kaina moto abomáki Abele. Mpe kaka ntango Abele akufaki, alobaki: “Nazwi momboto yango.” Abomaki yango. Alobaki: “Nazwi yango.” Kasi, kufa ya Abele, mbotama ya Sete ezalaki lisekwa lisusu. Bótala ndenge balandanaki.

<sup>108</sup> Molongo wana ya Sete, ezalaki na bato ya komikitisa, bayengebene; elekaki na nzela ya Enoka; ekobaki kino na Noa, kino na nsuka ya kobebisama na mpela.



109 Bótala molongo ya Kaina, bakomaki bato ya mayele mingi, bayékolá, zebi. Biblia elobi te ete . . . Yesu alobaki te, ete: “Bana ya mokili oyo bazali na bwanya koleka Bana na Bokonzi?” Bótala na ngambo ya Kaina ata lelo: bato ya mayele mingi, mayele ya kelasi, babeti ntembe, basambeli minene; bomoni, basambeli minene, kasi bato ya zebi, batongi, bato minene.

110 Bózua bato minene. Bótala Thomas Edison, bato minene mingi. Bótala Einstein, babongó ya mokili, ndenge babengaka bango, lelo, babongó na mokili. Kasi biso tolukaka kosalela bongó te. Totikaka ete Makanisi oyo ezalaki kati na Klisto ézala kati na biso, mpe totalelaka Liloba oyo, mpe tolobaka ete ezali bongo.

111 Minganga, atako topesaka bango losako na nyonso oyo tozali na yango, kasi mingi na bango bazali babeti ntembe, mpe bazangi kondima. Bótala bato na mayele mpe na boyebi mingi. Bazali na ngambo oyo kuna, na ngambo ya Kaina.

112 Kasi bótala bato na komikitisa mpe na bopolo. Wana nde lisekwa na bino lisusu. Oh, Nkombo na Nkoló épambolama! Yango wana nde. Bótala.

. . . akomisaki ye *mosangoli na libula ya biloko nyonso, na nzela na ye mpe asalaki mokili;*

Nani asalaki mikili? Klisto. “Klisto asalaki mikili?” Iyo, mesie. Tokende liboso mwa moke.

*Oyo azali bongengi ya nkembo na ye, mpe elilingi mpenza ya bozali na ye, . . .*

Bongengi na nkembo ya Nani? Nkembo ya Nzambe. Elilingi mpenza ya Bozali ya Nani? Ya Nzambe. Oh, nalingi yango mpenza!

*. . . to elilingi mpenza ya bomoto na ye, mpe akolendisaka biloko nyonso na nzela ya liloba . . .*

Yango mpenza. Liloba yango, oyo ezali kolendisaka biloko nyonso. Yesu alobaki, na Matai 24, “Likoló na nsé ekoleka, kasi Maloba na Ngai ekoleka soko moke te.” Alendisaka biloko nyonso.

113 Zebi elukaka kokitisa lokumu na Yango, mpe elobaka: “Ezali Buku moko ya kala. Elimbolamá.”

114 Ata lingomba Katoliko ya Roma, Episkopo Sheen alobaki: “Elimbolamá mbala minei to mitano, mpe Ezali mpenza na motuya te. Bokoki kobika na nzela na Yango te, soki esengelaki bongo.” Kasi Alendisaka biloko nyonso na nzela ya Liloba na Ye. Amen. Yango nde nakanisaka mpo na Yango. Nandimaka Biblia.

*. . . liloba ya nguya na ye, (nguya ezali kati na Liloba), ntango apetolaki masumu na biso na nzela na ye moko, . . . (bótala awa) . . . afandi na loboko ya mobali na Nkembo kuna na likoló;*

115 Paulo azali koluka kosala nini? Azali komeka kotalisa ete Nzambe akokisaki makambo nyonso kati na Klisto, mpe ete Klisto azalaki elilingi mpenza ya Nzambe. Mokapo mobimba oyo etikali elobeli ndenge Azalaki likoló koleka Banje, likoló koleka banguya nyonso. Banje bakumbamelaki Ye. Paulo azalaki koluka kokumisa Ye.

116 Sikoyo, nalingi komeka . . . Soki nakei mosika koleka oyo te, nyonso oyo etikali ezali kaka kokumisa Klisto. Oyo Paulo alobi awa, ndakisa na mokapo ya 11, mpe nyonso wana, azali koloba na ntina na mokili. Alobaki: “Alobaki na—na Mwanje nini ete: ‘Ozali Mwana na Ngai, Naboti Yo lelo?’” Bomoni?

117 “Na nsuka ya mokili, bango bakokufa. Mokili ekokufa. Kasi bi. . . Mpe biloko nyonso ya mokili ekokufa. Akolínga yango lokola elamba. Ekokóma ya kala, ekobongwana, mpe ekolimwa. ‘Kasi Yo otikalaka. Okotikala libela. Ozali Mwana na Ngai. Naboti Yo lelo, mpe Okokufa ata moke te, Ofandi na loboko ya mobali ya Bokonzi.’”

*Loboko ya mobali* elingi koloba nini? Ezali te ete Nzambe azali na loboko ya mobali, oyo moto moko afandi likoló na yango. *Loboko ya mobali* elingi koloba “nguya mpe bokonzi,” Azali na bokonzi likoló na biloko nyonso na Likoló mpe na nsé. Mpe Likoló mobimba ná nsé esalemi na Ye.

118 Sasaipi, Moto monene oyo ezali Nani, Mobali monene oyo, Klisto? Awa, Nzambe kati na Tata, Mwana mpe Molimo Mosanto, ezali te. . . Ezali bosato, kasi Ezali bosato ya bato te. Ezali bosato ya mosala, ya Nzambe moko.

119 Azalaki Tata oyo azalaki kokamba bana na Yisraele. Wana ezalaki mosala na Ye, Tata Yawe monene. Mpe Ye afandaki na mabelé, abengamaki Mwana. Mpe sikoyo Afandi kati na Lingomba na Ye, abengami Molimo Mosanto. Banzambe misato te; Nzambe moko na misala misato: Tata, Mwana mpe Molimo Mosanto.

Bato balukaka kokómisa Ye Banzambe misato bakeseni, Nzambe Tata. Ntina wana nde, Bayuda, okoki ata moke te, okoki ata moke te kopesa yango epai na Moyuda, te, yango te. Akoki te. Azali na mobeko moko oyo elobi ete: “Nazali bobele Nzambe moko.” Nzambe bobele moko.

120 Na Afrika, babatisaka na ndenge misato ekeseni: babatisaka mbala moko mpo na Tata, mbala moko mpo na Mwana mpe mbala moko mpo na Molimo Mosanto. Mission de la Foi Apostolique, babatisaka mbala misato, elongi liboso, mpo na kufa na Ye. Baoyo babengaka Plein Evangile na Libongo ya Westi, to na Libongo ya Esti, babatisaka mbala misato na nsima, balobaki ete Ye. . . Mpo na kokundama na Ye.

Mpe alobaki: “Ntango Akufaki, Akweyaki na liboso.”

<sup>121</sup> Mosusu alobaki: “Zela. Bakundaka moto na mokongo.” Kaka makambo mike mike ya kosala, na ntango oyo bango mibale bazali na libunga; bango mibale bazali na libunga, kokokana na Makomi.

*Oyo* nde Urimi Tumimi. Yango ekátaka likambo.

<sup>122</sup> Sikoyo, tala, tótalisa yango na elili mpo tomona lokola eloko—eloko nini yango ezali, na mpokwa oyo. Yango oyo, soko bolingi komona yango. Na mibu soko ntuku mibale na mitano mobimba oyo nazali motei, nayekolaki yango. Mpe namitunaka mbala na mbala mpo na makabo kati na lingomba. Makabo yango ezali nini? Lisakoli, koloba minoko na sika, ndimbola ya minoko na sika, emoniseli ya Bonzambe, mpe bongo na bongo, nyonso wana eyaka na nzela ya Klisto.

<sup>123</sup> Sikawa bótala. Klisto azali Motó ya makambo nyonso. Mpe Ye azali Motó ya Lingomba. Mpe bosilá komona diamá ya monene? Diamá ya monene mpenza oyo ekatami malamú, ezalaka na mwa biteni bipapolami uta na yango, epapolami uta na yango. Yango nde esalaka diamá ya malamú solo. Biteni wana ntina na yango nini? Diamá ya solosolo, lolenge oyo yango ebimaka, ebukamaka; diamá ya solosolo, ntango ezwamaka.

Nazalaki na Kimberley. Bino, mingi kati na bino, oyo boyokaki ete okoki kolokota ba-diamá na balabala, ezali bongo mpenza. Ngai ná Billy, mpe M. Bosworth. Moyangeli ya bisika ya diamá na Kimberly, amemaki. . . Azalaki mosungi na ngai na mayangani kuna. Mpe bamemaki biso kuna. Mpe na. . . Batimolaka yango, oh, pene na metre nkama mitano na nsé ya mabelé. Ebimaka, libanga ya bléu, ya bléu monene, lokola libanga ya bléu oyo ezalaka awa. Mpe batindaka baí-mboka wana na bozindo ya metre nkama mitano na nsé ya mabelé, kotimola yango, mpo ntalo na yango ézala kaka likoló. Soki okei na ebale kuna, babatelaka yango na ba-kilometre nkama na nkama. Soki omemi katini mibale ya litre ntuku minei, alobaki, mpe omati na yango, etondi na—na zelo, soko okoki komema yango kino na ndako, okokóma na mbongo ba-milió, ekozala na ba-diamá ebele kati na yango. Kasi basengeli kosala mpe kotimola yango, mpo ntálo na yango ézala kaka likoló.

<sup>124</sup> Sikoyo, diamá yango, ntango ebimaka, ezalaka lokola talatála moko ya monene, ya libungutulu mpe moselú. Diamá ya bléu ezali, diamá ya moindo, emerode, mpe diamá ezanga langi, diamá ya pembe. Kasi ntango ebimaka. . . Na bongo soki babongisi yango mpe batii yango na mosala, diama yango esengeli kobungisa eteni mosusu. Mpe esengeli kobungisa bi—biteni na yango. Mwa biteni oyo elongwaka, mpamba te, ntango ekutanaka mbala moko na pole, ndenge *wana*, engengaka. Eteni yango, eloko esalaka ete éngenga, ezali ndenge ekatami. Ekatami, epapolami, na nsima, ntango esalemi bongo, nde engengaka. Moko ekobimisa pole ya langi ya pondú, mosusu

ekobimisa pole ya bléu, mpe ntango mosusu, mosusu pole ya langi ya emerode, mpe pole ya motane. Mpe ba-pole ndenge na ndenge ebimaka uta na yango, lokola langi ya monama. Babengaka yango “móto kati na diamá.”

125 Sikawa, ba-pole yango moko na moko etalisaka makabo. Kasi ezali, kaka Klisto nde azali Diamá yango. Mpe Ye azali Ye Oyo ayaki, atutamaki, azokisamaki, mpe akatamaki, mpo Ákoka komitalisa Ye moko lisusu lokola Pole mpo na mokili. Ye nde Diamá Mokonzi yango.

126 Bokoki kokanisa, liboso mabelé moko kutu ézala, liboso pole moko ézala, liboso monzoto moko ézala, liboso ata eloko nini ézala? Liziba moko ya monene ezalaki kobima, ya Molimo, mpe kouta na Liziba oyo, bolingo eleki peto eyaki, mpamba te eloko mosusu ezalaki te, oyo ekokaki kobima kuna, bobele bolingo. Sikawa, biso, oyo biso tobengaka bolingo, lelo, ezali bolingo ebebisami. Kasi kaka ndenge tozuaka mwa moke, to mwa bolingo wana kati na biso, yango ebongolaka ndenge na biso ya komona makambo na mobimba.

127 Na bongo longwa na yango, mokele mosusu ebimaki, longwa na Liziba ya monene, Diamá, mpe ebengamaki boyengebene, boyengebene ya solo mpenza. Sikawa, yango wana tosengelaki kozala na mobeko. Yango wana mobeko esengeli kozala na etumbu. Soki etumbu elandi mobeko te, mobeko ekosala eloko moko ya malamau te. Mpe ntango etumbu ekatamaki na mobeko, oyo epesaka kufa, mpe moto moko te akokaki kofuta etumbu yango, bobele Nzambe Ye moko. Mpe Afutaki etumbu ya kufa na biso, mpe amemaki masúmu na biso likoló na Ye, mpo tókóma boyengebene ya Nzambe na nzela na Ye.

128 Sikawa, ntango ba-pole minene oyo ebimaki, to bongengi minene ya Molimo: bolingo, kimia, Yango nde nyonso oyo ezalaki kuna. Mipasi ezalaki te. Koyina e—ezalaki te, mayele mabe mpe te; ekokaki kouta na Liziba oyo te. Wana ezalaki Jehovah. Wana ezalaki Jehovah Nzambe. Mpe sikawa, ndenge ba-theologien babengaka yango, theophanie moko ebimaki uta na Yango, na Makomi ebengami: “Logos,” Logos oyo ebimaki kati na Nzambe. Ezali mpasi mpo na kolimbola yango, kasi Ezalaki eteni ya Nzambe.

129 Sikawa, tala oyo esalemaki. Oh! Bolimbisa ngai. Ntango na—na—nakómaka na likambo oyo, ememaka ngai mpenza esika oyo nalingaka yango. Bomoni? Logos, Liziba monene oyo, Liziba monene oyo ya Molimo, oyo ezalaki na ebandeli te to nsuka te; Molimo monene oyo ebandaki kosalema, na bokeli, mpe Logos oyo ebimaki uta na Yango ezalaki Mwana na Nzambe. Ezalaki lolenge bobele moko oyo ekokaki komonana, oyo Molimo ezalaki na yango. Mpe Ezalaki theophanie, elingi koloba nzoto moko, mpe nzoto yango ezalaki lokola moto.

<sup>130</sup> Mose amonaki Yango ntango Elekaki na . . . pene—pene na libanga. Mpe atalaki Yango, alobaki: “Ezalaki lokola mokongo ya moto.”

Ezali lolenge moko ya nzoto oyo tozwaka ntango tokufaka awa. “Soki mongombo ya mabele oyo ebebisami, tozali na mosusu oyo ezali kozela.” Ezalaki Yango. Mpe wana ezalaki theophanie oyo ezalaki Mwana na Nzambe. Mwana yango, Logos yango, akomaki nzoto, mpamba te totiamaki kati na nzoto. Mpe theophanie yango, Logos yango, ekómaki nzoto, awa kati na biso, mpe Ezalaki eloko mosusu te, bobele efandelo, mpamba te Liziba yango mobimba efandaki kati na Ye. Oh, bozali komona yango? Yango wana. Ezalaki Ye, oyo, na . . .

<sup>131</sup> Bótala awa. Tozwa nokinoki Baebele, mokapo ya 7, kaka mpo na ntango moke ya—ya ngolu, soki Nzambe alingi. Tótala ndenge ezali awa. Abraham!

Totikali na ntango boni? Totikali na minuti zomi. Malamu. Tokozua yango, bongo tokosilisa yango mbala ekoya, oyo ekoya, to mokolo na lomingo, soki Nkolo alingi.

<sup>132</sup> Abraham azalaki kozonga longwa na kobomama na mokonzi.

*Mpo ete Melekisedeke oyo, mokonzi na Saleme, . . .*

Bato boni bayebi wapi, nani, nini oyo Saleme ezalaki? Yelusaleme.

*. . . mokonzi na Saleme, nganga na Nzambe oyo aleki likoló, oyo akutanaki na Abalayama wana autaki koboma bakonzi, mpe apambolaki ye;*

Bóyoka.

*Oyo mpe Abalayama apesi ndambo na zomi ya biloko nyonso; ya liboso longwa na ndimbola Mokonzi oyo na boyengebene, . . . nsima na yango lisusu Mokonzi oyo na Saleme, elingi koloba, Mokonzi oyo na kimia;*

*Na tata te, na mama te, na eutelo na libota te, na ebandeli na mikolo te, soko nsuka na bomoi; . . .*

<sup>133</sup> Mokonzi moko autaki na Saleme, mpe akutanaki na Abraham oyo autaki na koboma bakonzi. Mpe Mokonzi oyo azalaki na tata te, azalaki na mama te, azalaki na ebandeli ya mikolo to nsuka ya bomoi te. Abraham akutanaki na Nani? Sikawa bókanisa. Azalaki na tata te; Azalaki na mama te. Atikálá kozala na ntango oyo Abandaki te, mpe Atikálá kozala na ntango oyo Akosuka te, boye Mokonzi ya Saleme yango asengeli kozala na bomoi lelo. Amen. Bomoni yango? Ezalaki theophanie oyo ezalaki Mwana na Nzambe wana. Saleme ezali nini? Yelusaleme oyo ezali na Likoló, oyo Abraham, esilaki ye kopambolama, azalaki kolukaluka, koluka, komeka koluka Engumba oyo Motongi mpe Mobongisi na yango azalaki Nzambe. Azalaki kotelengana na bamposo ya bampate

mpe ba-mposo ya bantaba, bisika nyonso, azangaki nyonso, kotelengana, mpe azalaki koluka Engumba moko, oyo Motongi mpe Mobongisi na yango azalaki Nzambe. Mpe akutanaki na Mokonzi ya Saleme yango, koyáká, mpe afutaki Ye ndambo na zomi ya biloko nyonso oyo asilaki kozua. Amen. Ezali Ye. Oh, Ndeko Graham, wana ezalaki Ye. Ezalaki Ye.

Abraham amonaki Ye lisusu. Mokolo moko azalaki ya kofanda na kati ya héma. Atalaki, bazalaki koya kuna, amonaki mibali misato bazali koya.

<sup>134</sup> Boyebi, Moklisto azalaka na eloko moko, oyo esalaka ete áyeba Molimo, ntango amoni Yango. Ntango a . . . Ayebaka yango kaka. Ezalaka na eloko moko ya Molimo na ntina na yango. Makambo ya Molimo esosolamaka na ndenge ya Molimo. Boyebi. Iyo, akoki mpenza koyeba, soko abotama mpenza. “Bampate na Ngai bayebi Mongongo na Ngai.”

<sup>135</sup> Mpe ayebaki ete likambo moko ezalaki. Abimaki mbangu mpe alobaki: “Kota, Nkolo na ngai. Fanda. Pema mwa moke. Nakozwa eteni ya lipa mpe nakotia na loboko na Yo. Nakosukola makolo na Yo. Pema, bongo Okokoba mobembo na Yo, mpamba te O—Oyei kotala ngai.” Kuna, na mokili mokaoká, azwaki nzela ya mpasi, nzela moko na bato moke ya Nkolo, oyo batiolami.

Nzokande, Lota azalaki kobika kati na bozwi, mwana ya ndeko na ye kuna, kasi azalaki kobika kati na lisumu. Yango nde oyo mingimingi bozwi ebataka lisumu.

<sup>136</sup> Boye Abraham amemaki Bango epai na ye, wana azwaki mwa mai mpe asukolaki bango makolo. Akendeki mbangu epai ya bana-ngombe, mpe azwaki mwana-ngombe ya mafuta kati na etonga, mpe abomaki yango; apesaki yango na mosali moko, mpo ábongisa yango. Mpe alobaki: “Sara, nika farine ya fufu na yo.”

Boyebi nini konika ezali, oyo elingi koloba. Boyebi, mama azaláká na nzete ya fufu moko ya kala, azaláká kotia yango kati na—na katini ya farini ya fufu. Bosilá komona yango, ná kiyungulu? Mpe bazalaki kotia nzete ya fufu na kati, bazalaki koyungula fufu, boyebi; mpe bazalaki kopusa yango *boye*, mpo na kolekisa yango, tóloba. Namoná mama kosala yango, mbala mingi, nzete ya fufu, ná mwa eloko moko ya libungutulu, ezalaki na mwa kiyungulu. Akotia fufu wana mpe akoyungula yango ndenge *wana*, boyebi, mpe kobetabeta yango ngambo na ngambo, ndenge *wana*. Na nsima akozwa nzete ya fufu mpe kolekisa yango, *boye*, mpo na kokitisa yango nyonso. Mpe ezalaki na ntango wana nde tozaláká kokende konikisa fufu na masini ya kala; ná bambuma minene wana, ya kala, boyebi, ya bozito, ezalaki kosala mapa ya masango ya solosolo. Okokaki kokata bantzete mói mobimba, ná yango.

<sup>137</sup> Bongo, alobaki: “nika mwa fufu ya farine, noki-noki. Mpe bongisa mwa mapa awa na móto, noki mpenza.” Mpe babendaki miliki na ngombe mpe bazwaki miliki. Mpe bazwaki yango,

basangisakisangisaki yango, mpe bazwaki mwa matéka. Mpe na nsima bakendeki koboma mwana-ngombe mpe bazwaki misuni, mpe bakalingaki mosuni yango. Bazwaki mateka ya miliki yango, lipa ya masango, mpe bazwaki mwa mateka ya kotia likoló na lipa ya móto. Oh, elengi mpenza. Mpe bapakolaki yango likoló na mapa. Mpe abimaki na yango, mpe akitisaki yango liboso na Bato wana misato.

<sup>138</sup> Mpe wana Bazalaki kolia, Bakobaki kotala na ngámbo ya Sodoma. Mpe nsima na mwa ntango, Batelemaki wana mpe babandaki kokende. Mpe Alobaki: “Abraham. . .” Alobaki: “Okobombela ngai yango te.”

<sup>139</sup> “Nakoki kobombela yo te oyo Nalingi kosala. Nazokita kuna. Masumu ya Sodoma ekomi na litoi na Ngai.”

Moto yango azalaki nani? Putulú na bilamba na Ye mobimba, afandaki wana mpe azalaki kolia mosuni ya mwana-ngombe, mpe komela miliki ya ngombe, mpe kolia lipa ya masango, batiá mateka. Moto oyo ya ndenge boye azali Nani? Mibale, to misato na Bango, bafandaki wana. Putulú na bilamba na Ye nyonso. Oh, iyo, “Touti na Mboka mosika.” Iyo, mosika mpenza. Na bongo Alobaki . . . Ee, Bazalaki Banani?

<sup>140</sup> Alobaki: “Nakoki kobombela Abraham te, mpo azali mosangoli na mabelé.” Amen. “Namonisaka mabombami na Ngai,” na elobeli mosusu, “epai na baoyo bazali basangoli na mabelé.” Wana nde esika oyo Lingomba esengelaki kozala lelo. Ya solo. Kozwa ba-Sekele ya Nzambe, koyeba komikamba, mpe kosala, mpe nini kosala, mpe ndenge ya kotambola, mpe ndenge nini kobika. Tozali basangoli ya mabelé. Ya solo. Amonisi bino Yango, mpamba te Akoki kobombela bino eloko moko te. Yango wana tozotala makambo oyo kokokisama.

Mokili elobi: “Ah, oyo wana ezali liboke ya bindimandima.” Bótika bango baloba bongo. Mosangoli ya mabelé ayebi makambo oyo. [Maloba mazangi na eteni oyo ya bande—Mok.]

. . . mpo bakobéngama bana na Nzambe.

*Esengo na baoyo bazali bato ya boboto: mpo bakosangola mabelé.*

Ayebisaka bango basekele na Ye, Amonisaka bango yango, Alakisaka bango eloko ya kosala mpe ndenge na kobika, kotika makambo ya mokili; kotambola na boyengebene mpe kobika na boyengebene, kati na mokili ya lelo oyo, kotambola elongo na Ye. Tika mokili baloba oyo balingi koloba.

<sup>141</sup> Boye Alobaki: “Nakoki kobombela Abraham sekele oyo te, mpamba te azali mosangoli ya mabelé. Kasi,” Alobaki, “Nazokita kuna mpo na kobebisa Sodoma. Nazokita kuna.”

<sup>142</sup> “Okosala nini, Mesie? Epai wapi Outi? Likambo yango ezali nini?”

143 Toyei komona ete Alobaki, “Mpe eloko mosusu, Abraham, ozeli elaka oyo Napesaki yo mibu ntuku mibale na mitano. Osombi bilamba ya babebé, ba—ba—epingle mpe biloko nyonso, mpo na bebé oyo, esili koleka mibu ntuku mibale na mitano. Ozali kokóba kotalela Ngai. Sikoyo Nakoya kotala yo, pene na ntango na bomoi, kokokana na ntango na bomoi, na sánzá ekoya Nakozala elongo na yo.”

144 Mpe Sara azalaki na nsima, na kati ya hema. Mpe Moto oyo apesaki mokongo na hema, kosolóláká na Abraham, *boye*. Mpe Sara asalaki: “Hah!”

145 Alobaki: “Eloko nini esekisi Sara?” Ho-ho-ho! Bolobi nini na oyo wana? Ezalaki mpenza telepathie ya kafukafu, boye te? “Eloko nini esekisaki Sara?”

Sara alobaki: “Te. Naseki ata moke te.”

146 Alobaki: “Oh, iyo, oseki.” Abangaki. Azalaki kolenga. Wana ezalaki Nani, oyo akokaki koyeba oyo azalaki kosala na nsima, na kati ya hema? Ezali Nzambe Yango moko oyo azali na biso elongo lelo. Ye Moko wana. Ayebi nyonso na ntina na yango. Bomoni? Amonisaka yango kokokana na bosenga na bino. Bomoni?

147 “Oseki nini?” Bomoni, Apesaki yango mokongo. Biblia elobi yango, ete: “Apesaki mokongo na hema.” Kasi, Ayebaki yango. “Mpo na nini azali kosala *boye*, kuna na nsima?” Bomoni? Boye, Alobaki: “Nakoya kotala yo.”

148 Moto oyo ya ndenge ezali Nani? Boyebi eloko esalemaki? Alongwaki wana mpe Alimwaki. Mpe Biblia elobi ete Ezalaki Nzambe na Nguya nyonso, Jehovah, Liziba monene wana, Theophanie wana, Logos wana.

149 Motei moko alobaki na ngai, eleki mwa ntango, alobaki: “Ndeko Branham, okanisaka mpenza te ete wana ezalaki Nzambe, boye te?”

150 Nalobaki: “Biblia elobi ete Ezalaki Nzambe, Elohim.” Oyo, Azalaki Nzambe na Nguya nyonso, El Shaddai, ya solo, Mopesi-Makasi, Mosepelisi. Amen.

151 Oh, namiyoki lokola mosambeli! Bókanisa naino. Ye oyo, ezali Ye. Sikawa nakotalisa bino Nani oyo Ye azali awa, na bongo bokomona Nani oyo Mwana azali. Wana ezalaki Yesu, liboso ete Azwa Nkombo ya moto: “Yesu.”

152 Atelemaki wana na liziba na mokolo wana. Mpe bango nyonso bazalaki komela, boyebi, mpe: “Bazalaki na mai oyo ezalaki na lisobe,” mpe makambo ya ndenge wana. Alobaki. . . Bazalaki kolia mána mpe biloko mosusu. Balobaki: “Batata na biso baliaki mána na lisobe, mibu ntuku minei.”

153 Alobaki: “Mpe bango nyonso, bakúfá.” Alobaki: “Ngai nazali Lipa na Bomoi oyo euti na Nzambe, longwa na Likoló. Ye oyo akolia Lipa yango akokufa mokolo moko te.”



154 Alobaki: “Boye, batata na biso bamelaki mai longwa na Molimo, longwa na Libanga ya molimo oyo ezalaki na lisobe, oyo ezalaki kolanda bango.”

155 Alobaki: “Nazali Libanga yango.” Nkembo! Santu Yoane, mokapo ya 6.

“Na bongo,” balobaki, “nini?”

“Iyo. Ya solo.”

156 “Na bongo,” alobaki, “Ozali. . . Okokisi ata na mibu ntuku mitano te.” Na ntembe te, mosala na Ye ekomisaki Ye mwa mokóló, kasi Azalaki bobele na mibu ntuku misato. Alobaki: “Ozali mobali oyo oleki mibu ntuku mitano te, kasi olobi ete omonaki Abraham, oyo asilá kokufa eleki mibu nkama mwambe to libwa? Toyebi sikawa ete ozali zabolo.”

157 Alobaki, “Liboso Abraham ázala, NAZALI.” Ye wana. NAZALI azalaki Nani? Nkombo ya ntango nyonso mpo na bikeke nyonso. Yango ezalaki nde. . . Likonzi na Móto wana na nzete ya kopela moto, “NAZALI OYO NAZALI.” Tala Azalaki wana, Theophanie oyo Asalaki awa, ebiangami Mwana na Nzambe, NAZALI, Jehovah.

158 Tomá alobaki: “Nkolo, lakisa biso Tata mpe ekokoka na biso.”

159 Alobaki: “Nazali na bino mikolo mingi, yo oyebi Ngai te?” Alobaki: “Ntango bomoni Ngai, bomoni Tata. Mpo na nini koloba: ‘Lakisa biso Tata’? Ngai ná Tata tozali Moko. Tata na Ngai afandi kati na Ngai. Nazali bobele mongombo oyo ebengami Mwana. Tata afandi kati na Ngai. Ngai nde nasalaka misala yango te, ezali Tata na Ngai oyo afandi na kati na Ngai. Ye nde asalaka misala, Ngai te.”

160 Sikawa, wana atelemaki kuna, lisusu, Mose amonaki Ye, eteni ya nsima na Ye, alobaki: “Ezalaki lokola mokongo ya moto,” Logos oyo elongwaki uta na Nzambe.

161 Na bongo nini esalemaki? Ezalaki Nzambe. Mpe ntina oyo Alongwaki na Logos kino na nzoto. . . Ezalaki nini. . . ? Ndenge nini. . . ? Eloko nini ekómaki na wana? Minuti mitano liboso na yango, Azalaki. . . Azalaki Logos. Kasi Asalaki nini? Asembolaki bobele loboko. . .

162 Sikawa, ba-nzoto na biso esalemá na biloko zomi na motoba ya mokili. Toyebi yango. Esalemá na potasse mpe—mpe mwa—mpe mwa calcium, mpe—mpe petrole, mpe pole ya kosmos, mpe ba-atome, mpe bongo na bongo. Nyonso esangisami esika moko, mpe esali nzoto oyo, eutaka na putulú ya mabelé. Boliaka biloko. Wana bozali kolia biloko, ebongwanaka. . . longwa na putulú, mpe eutaka na putulú, mpe ezali kaka—kaka kokende liboso. Mosuni na bino, mpo na oyo etali mosuni, ekeseni te na oyo ya mpunda, to ya ngombe, to ya nyama mosusu nyonso. Ezali kaka mosuni.

163 Mpe, moninga, ozali kokumisa mosuni; kasi molimo wana ezali na elimo kuna na kati, ndeko na ngai. Ya solo. Kasi mosuni na yo ezali bobele putulu ya mokili, lokola oyo ya nyama. Mosuni na yo eleki ya nyama te. Mpe soki olulaka mosuni mpe biloko omonaka, kolula basi, kolula biloko nyonso oyo ndenge na ndenge, ezali bobele nyama. Ya solo. Ya solo. Osengeli kosala bongo te. Molimo na Nzambe akokamba yo mpe ekotia yo na esika eleki likoló koleka oyo wana. Ezali mpenza bongo.

164 Sikoyo, mpe awa, Theophanie monene oyo ezalaki wana. Nini . . . Jehovah Nzambe monene wana, boyebi nini oyo Ye alobaki? Asembolaki bobele loboko mpe azwaki ndambo ya batome, azwaki mwa ndambo ya pole, mpe asopaki yango na kati, *boye*, esalaki: “Fiuu,” nzoto moko, mpe akotaki na kati na yango. Esili.

165 Alobaki: “Yaka awa Gabriel,” mokolo na Banje monene wana. Esalaki: “Fiuu.” “Kota kati na *yango*.”

166 “Yaka awa, Michael,” Mwanje oyo azalaka na ngámbo na Ye ya mobali. “Fiuu.” Mpo . . . “Yo kota kati na *yango*.”

167 Nzambe, ná Banje mibale, bakitaki awa kati na nzoto ya moto, mpe bamelaki miliki ya ngombe, baliaki mateka kouta na miliki yango, mpe baliaki lipa ya masango, mpe baliaki mosuni ya mwana-ngombe. Banje mibale mpe Nzambe. Biblia elobi bongo. Ezali Melekisedeke, oyo Abraham akutanaki na Ye, wana autaki na koboma bakonzi. Ezali Mwana na Nzambe.

168 Bókende liboso, awa na Baebela, na oyo ya 7, elobaki: “Kasi asalemi na motindo na Mwana na Moto.” Ye wana. Asalaki biloko nyonso na nzela na Ye. Mpe Abimaki wana, mpe Abongolaki putulú yango, ekómaki lisusu putulú, mpe Azongaki mbala moko na Nkembo.

169 Mpe Banje yango, kaka ntango basilisaki kokangola Lota mpe Mme. Lota oyo akobaki kotala na nsima. Alobaki, ayebisaki bango ete básala bongo lisusu te. Mpe bazongaki mbala moko na—na Bozali na Nzambe.

170 Sikawa, tozali na elikia monene kati na Kondima monene oyo tozali kosalela na mpokwa oyo! Nzambe na bomoi, Jehovah, Likonzi na Moto, azali elongo ná biso. Azali komilakisa Ye moko na Nguya, na mosala, mpe kokumisa . . . Atikaki bango bákamata Foto na Ye, Jehovah yango moko. Mwana na Nzambe oyo autaki na Nzambe, azongaki na Nzambe, mpe afandi kati na Lingomba na Ye mpo na libela. Tala Ye wana.

171 Azali na ba-nkombo na biso na Buku na Ye, ná ndai akati na Ye moko, mpo mosusu koleka Ye azali te, oyo Ye akoki kokata ndai na ye, ete Akosekwisa biso na mokolo na nsuka. “Ye oyo akolia Mosuni na Ngai, mpe akomela Makila na Ngai, azali na Bomoi na Seko, mpe Nakosekwisa ye mokolo na nsuka. Ye oyo akoya epai na Ngai, Nakobengana ye soko moke te. Ye oyo akoyoka Liloba na Ngai, mpe akondimela Motindi na Ngai, azali

na Bomoï na seko, mpe akokóma na esambiseli te, kasi asili kolongwa na kufa mpe koingela na Bomoï.”

172 Kaka Moko wana nde akokaki kozwa mwa ndambo ya calcium mpe potasse, kosala: “Fiuu,” mpe tala yo wana lisusu. Mpe nkombo na ngai ezali na Buku na Ye. Ho-ho! Ho-ho-ho-ho! Ekotungisa ngai na nini ndenge mapeka na ngai ézogumbama, to ndenge nini nakonuna? Nakomitungisa te. Kotungisama ata moke te.

173 Ndeko Mike, moko na mikolo oyo, pambwama, ndeko, ntango kelelo monene wana ekobeta, ekoyula, mpe Joseph wana akoya. Aleluya! Akoloba: “Bana!” “Fiuu.” Tokozala wana, tokokóma lokola Ye; bilenge mpo na libela, bompaka eleki; bokono, mitungisi, bolozì elimwe. Nkembo ézala epai na Nzambe na bomoi!

174 Na nzela na Ye nde Azali koloba, lelo, Mwana na Ye. “Na ntango ya kalakala mpe na ndenge mingi, Alobaki na nzela ya basakoli, kasi na ntango oyo ya nsuka, na nzela ya Mwana na Ye, Klisto Yesu.” Alobaka na motema ya moto nyonso oyo Ye asili kobiana. Soki otikálá koyoka Mongongo na Ye to koyoka Ye kobeta na motema na yo, nabondeli yo koboya Yango te.

#### Tóbondela.

175 Tata na Likoló, na mpokwa oyo, lokola tozali na esengo ya koyeba, na bofungolami ya mokanda oyo ya Baebelé, ete Paulo azongaki mbala moko na Nsanga-malamu. Aboyaki kokamata yango bobele longwa na oyo bato balobaki to na oyo babikelaki. Alingaki ete toyeba oyo ezalaki Solo. Mpe azongaki mbala moko na Nsanga-malamu, mpe ye . . . azongaki na Kondimana na Kala, Nsanga-malamu oyo eteyamaki na bango. Mpe amonaki, na nzela na Kondimana na Kala kuna, bililingi ná bitaliseli nyonso. Yango wana tozali na Buku monene oyo ya Baebelé na mpokwa oyo. Mpe tomoni Yango, Nkolo, mpe tolingi Yango. Mpe kati na bileko, Ezikisamaki, Epanzamaki, bamekaki kolimwisa Yango, kasi Ezali kaka kokende liboso. Mpo Yo olobaki: “Likoló mpe nsé ekoleka, kasi Maloba ma Ngai makoleka te.”

176 Bongo, moto na ntembe akoloba ete: “Ee, olobaki ete: ‘Paulo moto akomaki yango.’” Paulo te, kasi Nzambe oyo azalaki kati na Paulo; Ezali ya bokeli wana oyo ezalaki na kati ya Paulo.

177 Kaka ndenge Azalaki kati na Dawidi, ntango alobaki: “Nakotika Mobulami na Ngai komona kopola te, mpe Nakotika molimo na Ye na ewelo te.” Mpe Mwana na Nzambe azuaki Maloba yango uta na mosakoli wana, mpe akendeki mbala moko kino na kati ya ewelo. Mpe Alobaki: “Bóbuka mongombo oyo, mpe Nakotelemisa Yango na mikolo misato.” Mpe Asalaki yango, mpamba te Liloba na Nzambe ekoki kokwea te; ata litónó moko ekoki kokwea te. Totondi mpenza Nzambe mpo na oyo, Urimi Tumimi monene oyo, mpe koyeba ete makambo tobikeli na

mpokwa oyo, Nkolo, ezali mpenza kopelapela na Biblia oyo! Tobotami mbala na mibale, tozali na Molimo Mosanto.

178 Nzambe molingami, soki mobali to mwasi moko azali awa na mpokwa oyo, mwana mobali to mwana mwasi, oyo abikeli naino likambo oyo te, ndenge nini bakoki kosekwa soki Bomo ezali na kati te? Oo, balobaka: “Nazali na Bomo.”

179 Kasi Biblia elobi: “Mwasi oyo akobika kati na bisengo asili kokufa, ata azali na bomoi. Olobi ete ozali na Bomoi, kasi osíli kokufa. Olobaka,” elobi Biblia, “ete ozali na Bomoi, kasi osíli kokufa. Olobaka ete ozali mozwi mpe ozali na bosenga ya eloko moko te; kasi oyebi te ete ozali moto na mawa, mobola, bolumbu, mpe mokufi miso, kasi oyebi yango te.” Mpe yango nde lolenge ya mangomba na mpokwa oyo, Nkolo. Bazali mpenza kozanga makambo minene mpe ya motuya oyo.

Koyeba ete Jehovah Nzambe monene, Oyo akoki bobele kobimisa na nzela na . . . Alobaki: “Boyela Ngai mwa ba-mbisi wana.” Asengelaki kozwa ba-mbisi yango mpo—mpo na kosala ná yango eloko moko. Kolakisa ete lisekwa, esengelaki kozala eloko moko, mpo na kosala eloko moko ná yango. Asalaki kaka mbisi te, kasi Asalaki mbisi balámbá, ná mapa balámbá. Mpe Aleisaki bato nkóto mitano ná mwa mbisi mitano . . . mwa mapa mpe mbisi mibale. E Nkolo, ezalaki na maboko na Ye, mpe Azalaki Mokeli. Kasi Asengelaki kozala na eloko moko na loboko na Ye.

Nzambe, tika ete tómitia na maboko na Ye, na mpokwa oyo, mpe tóloba: “E Nzambe, zwa ngai ndenge nazali. Mpe ntango nsuka ya bomoi na ngai ekokoma, tika ngai nákende na elikia oyo ezalaki kati na ngai, koyeba ete nabotami mbala mibale, mpe ete Molimo na Yo etatoli na ngai, mpe etatoli na molimo na ngai, ete nazali mwana na Yo ya mobali to mwana na Yo ya mwasi.” Mpe na mokolo na nsuka wana, Okosekwisa bango. Sala yango, Tata.

180 Mpe wana togumbi mitó, ezali na moko oyo akolinga kotombola loboko, koloba: “Kanisa ngai, Ndeko Branham, na libondeli. Nalingi ete Nzambe áyéba ngai ntango . . . liboso nátika mabele oyo, ete Ayeba ngai malamumu na lolenge ete Akobenga nkombo na ngai. Nakoyanola.” Nkolo ápambola yo mwana mobali. Nzambe ápambola yo, yo mpe; yo mpe, mwasi. Moto mosusu? Tombola bobele loboko. Loba: “Bondela mpo na ngai, Ndeko Branham.” Yango nde tokosala. Nzambe ápambola yo, elenge mwasi. Ezali malamumu.

181 Sikawa, wana bogumbi mitó, kobondeláká, nakoyemba eteni ya loyembo oyo:

Lula bozwi mpamba ya mokili oyo te,  
Oyo ezali kobeba noki,  
Tongá elikia na yo likoló na biloko ya Seko,  
Yango ekoleka te!

Simba loboko na Nzambe oyo ebongwanaka  
te!  
Simba loboko na Nzambe oyo ebongwanaka  
te!  
Tongá elikia na yo likoló na biloko ya Seko,  
Simba loboko na Nzambe oyo ebongwanaka  
te!

182 Wana ndeko mwasi azali kobeta sikawa, mpe wana mitó egumbami, sembola loboko, loba: “Iyo, Nkolo, ya ngai yango oyo”? Ekosala nini? Ekotalisa ete molimo na yo, kati na yo, ezwi mokano. “Nalingi loboko na Yo, Nkolo.” Nzambe apambola yo, elenge mwana mwasi. “Nakotombola loboko.” Nzambe apambola yo, mwana moke ya mwasi, oyo awa. Ezali malamú, molingami. Nzambe, boyebi, asepeti komona yo kosala bongo. “Botika bana mike baya epai na Ngai.”

183 “Nalingi, e Nzambe, ete Osimba loboko na ngai. Mpe na mokolo wana, nalingi kozala kati na loboko na Yo; mpo, ntango Okobenga, náya.” Iyo, lokola Lasalo. Nzambe apambola yo, ndeko mwasi.

Ntango mobembo na biso ekosila,  
Soki epai na Nzambe ozalaki sembo,  
Ndako ya kitoko mpe ya kongenga na Nkembo,  
Elimo na yo oyo enetolami ekomona.

Okosala nini sikawa, na nsima?

Simba loboko na Nzambe oyo ebongwanaka  
te!  
Simba loboko na Nzambe oyo ebongwanaka  
te!  
Tongá elikia na yo likoló na biloko ya Seko,  
Simba loboko na Nzambe oyo ebongwanaka  
te!

184 Tata na Likoló, maboko ebele etombwami, kati na liyangani moke oyo, na mpokwa oyo, ete balingi kosimba, na mpokwa oyo, loboko na Yo ya Seko, oyo ebongwanaka te. Koyeba ete oyo epesami na loboko na Yo. . . Olobaki: “Ngai. . . Baoyo nyonso Tata apesi Ngai bakoya epai na Ngai, mpe ata moko te kati na bango akobunga. Mpe nakosekwisa bango na mokolo na nsuka. Bakokufa soko moke te, bakosambisama soko moke te, kasi bazali na Bomoi na Seko, na Seko.” Mpe Bomoi na Seko ezali bobele moko. Yango eutaka bobele na Nzambe. Ezali Nzambe. Mpe tokómaka eteni ya Nzambe, na lolenge ete tokómaka bana mibali mpe bana basi na Nzambe. Ntango tozali na Molimo na Nzambe kati na biso, tokokanisa lokola Nzambe. Tokokanisa boyengebene mpe bosantu, mpe tokomeka kobika mpo na kosepelisa Ye.

185 Nkolo, sala ete Bomoi ya lolenge wana ékóta kati na moto nyonso oyo atomboli loboko. Mpe baoyo basengelaki kotombola

maboko, kasi batomboli te, nabondeli ete Ózala na bango. Sala yango, Tata. Ntango mobembo ekosila mpe bomoi ekosuka, tika ete tókóta na kimia na mokolo wana, elongo na Ye, epai wapi tokokóma ba-mpaka te, tokobela soko moke te, mikakatano ekozala soko moke te. Kino na ntango wana, batela biso na esengo mpe na nsái, wana tozali kokumisa Ye, mpo tosenji yango na Nkombo na Ye. Amen.

<sup>186</sup> Bino nyonso bandimi, sikoyo, tótombola maboko mpe toyemba mondimo yango.

Simba loboko na Nzambe oyo ebongwanaka  
te!

Simba loboko na Nzambe oyo ebongwanaka  
te!

Tongá elikia na yo likoló na biloko ya Seko,  
Simba loboko na Nzambe oyo ebongwanaka  
te!

<sup>187</sup> Sikawa tóyemba yango na nsé ya mongongo. Wana ozali kosala bongo, loba na mozalani na yo: “Nzambe ápambola yo, mozalani.” Pesa mbote ya loboko na moto oyo afandi pembeni na yo. “Nzambe ápambola yo.” Na ngambo nyonso mibale sikawa. Na ngambo nyonso mibale, bopesana mbote ya loboko. “Nzambe ápambola yo, mozalani. Nzambe ázala na yo.” “Tongá elikia na yo likoló na biloko ya Seko.”

Doc, nayebi ete ezali wana, ndeko. Nayebi ete obikelaka yango, Ndeko Neville, eleki ntango molai.

Ntango mobembo oyo ekosila,

Ekosalema, moko na mikolo oyo.

Soki tozalaki sembo epai na Nzambe,

Tokomona Ndeko Seward Kuna.

Ndako na yo na Nkembo ekongenga se  
kongenga,

Elimo na yo oyo enetolami ekomona.

Simba loboko na Nzambe oyo ebongwanaka  
te!

Nasepelaka na kokumbamela yango, nsima na liteya.

Simba loboko na Nzambe oyo ebongwanaka  
te!

Tongá elikia na yo likoló na biloko ya Seko,  
Simba loboko na Nzambe oyo ebongwanaka  
te!

Ntango etondi na mbongwana-mbongwana,  
Eloko moko te ya mokili oyo ya koningana  
ekotelema,

Tongá elikia na yo likoló na biloko ya Seko,  
Simba . . .

Tika ete tómona Ye, Ye oyo azali komonana te kati na biso sikawa, mpe tókumbamela Ye sikawa, wana tozali koyemba.

Simba loboko na Nzambe oyo ebongwanaka  
te!

Simba loboko na Nzambe oyo ebongwanaka  
te!

Tongá elikia na yo likoló na biloko ya Seko,  
Simba loboko na Nzambe oyo ebongwanaka  
te!

Kimia! Kimia! Kimia kitoko,

Bokumbamela Ye kaka sikawa.

Kokita . . .

Liteya esili. Ezali nde kokumbamela.

Tondisa molimo na biso libela, nabondeli,  
Na bozindo ya bolingo oyo eyebi kopimama te.

Bozinda kati na Ye.

Kimia! Kimia! Kimia ya kokamwa,  
Kokita longwa na . . .

Liziba monene wana, Ezali nde kofungwama.

. . . likoló;

Tondisa molimo na biso libela, nabondeli,  
Kati na bolingo oyo ezangi kopimama.

Yango ezali kosala eloko moko, boye te?

. . . Kimia ya kokamwa,

Ezali kokita longwa na Tata na biso Likoló;  
Tondisa molimo na biso libela, nabondeli,  
Kati na bolingo oyo ezangi kopimama na nsé.

Ezali na eloko moko na ntina na Yango, ya nkita mpe ya elengi?

<sup>188</sup> Nazali komituna soki mobeli moko akolinga ete ápakolama mafuta mpe bábondela mpo na ye. Soko azali, luka esika moko. Ezali nde mwasi oyo afandi kuna, na kiti ya bibosono? Bótika ye ázala wana. Nakoya kobondela mpo na ye. Akozala na ntina ya kotelema na kiti te. Mosusu?

Oh, bolingaka eteni oyo ya losambo, boye te? Bato boni bazali koyoka, koyeba ete Bozali na Nzambe ezali awa? Yango nde nalobelaka. Yango moko . . . Bozali koyoka mposa ya . . . Bato boni bazali koyoka mposa ya koganga? Sikawa tótala naino. Bozali koyoka lokola nde eloko moko kati na bino elingi koganga. Bomoni?

Ezali kimia! Kimia! Kimia ya kokamwa,  
Ezali kokita longwa na Tata na Likoló;  
Tondisa molimo na ngai libela, nabondeli,  
Kati na bolingo na nsé ezangi kopimama.

Ngenga likoló na ngai,

<sup>189</sup> Wana tozali kokumbamela, tokopakola babeli mafuta sikawa, mpe tokobondela mpo na bango. Madame, okolinga koya na nzela oyo, boye te?

<sup>190</sup> Elingi koloba nini? “Libondeli ya kondima ekobikisa mobeli.” Moto nyonso ázala kati na mabondeli sikawa, bóyemba loyembo yango na nsé ya mongongo. Bókanisa na ntina Yesu ete azali kobikisa babeli.

Pakola ye mafuta . . . ? . . .





*BAEBELE, MOKAPO YA LIBOSO* LIN57-0821  
(Hebrews, Chapter One)

MATEYA LIKOLO NA BUKU YA BAEBELE

Liteya ya Ndeko William Marrion Branham oyo, eteyamaki liboso na Anglais mokolo ya Misato na mpokwa, mwa 21 na sanza ya Mwambe, na mobu 1957, na Branham Tabernacle, na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)